

四庫全書

史部

欽定四庫全書

史部

關中奏議卷十

詳校官侍講臣法式善

編修臣裴謙覆勘

總校官進士臣繆琪

校對官中書臣王家賓

謄錄監生臣楊景猷

欽定四庫全書

關中奏議卷十

明 楊一清 撰

後總制類

一為邊務事

欽差總制陝西延寧甘涼軍務都察院都御史臣楊一清謹題為邊務事臣於本年五月初四日在於原籍直隸鎮江府丹徒縣該錦衣衛舍人王諫齋捧節該欽奉

勅今仍命爾總制陝西延綏寧夏甘涼等處各路邊務  
欽此欽遵除具本謝恩及將起程日期奏報外伏念臣  
本書生不諳戎務誤蒙簡命夙夜兢惕不敢自寧兼程  
前進本月二十一日到於陝西地方訪得寧夏叛逆首  
惡周昂何錦等已就擒戮蓋由皇上神武布昭德威遠  
被不待加兵地方底定誠宗社萬億年無疆之休也臣  
切恐大變之後人心驚疑或有潛入套中遁往山後勾  
引套人重為後患已經出給榜文差官星馳齎往彼處



地方張掛奉宣朝廷德意曉諭四衛官軍人等除有名  
首惡不宥外其餘脅從之徒已有節奉詔勅宥免恩例  
各安職役照舊生理無懷驚疑各該部領官員務要加  
意撫恤不許聽人讐攀誣指濫及無辜若是原謀首惡  
未曾捉獲盡絕亦要設法擒拿毋令潛逃引敵為患臣  
仍兼程前去欽遵相機行事防禦套人外緣係緊急邊  
情事理為此今將臣到於陝西地方行事日期具本謹  
具題知

一為衆官反逆殺死鎮巡大臣等事

題為衆官反逆殺死鎮巡大臣等事准兵部咨該本部  
題前事會官議得慶府安化王寘鐸叨居遠裔安享厚  
祿不知感恩圖報却乃逆理亂常交結逆賊何錦周昂  
丁廣等謀為不軌戕害重臣反形已彰天誅難逭伏望  
皇上斷以大義先將寘鐸削去封爵俟擒獲之日議罪  
再乞命將專征聲罪致討等因具題奉聖旨寘鐸交結  
羣小殺害鎮巡重臣占據城池索要軍馬地圖反形已

露卿等既這等說遣官祇告宗廟革去寘鐫王爵正名  
討罪着都察院右都御史楊一清提督軍務涇陽伯神  
英掛平朔將軍印充總兵官一同節制京營并陝西寧  
夏延綏甘涼各路軍馬前去勦殺各寫制勅與他欽此  
欽遵備咨到臣切照逆賊何錦周昂丁廣等交結寘鐫  
潛謀不軌罪惡滔天神人共怒天討之所必加大義之  
不容已皇上軫念西土蒼生恐遭荼毒致煩京營人馬  
冒暑遠征此與虞舜有苗之征高宗鬼方之伐異世而

同揆者也臣初到陝西提督軍務勅書尚未齊至各鎮將官相離尚遠未據呈報傳聞鎮守陝西總兵官曹雄與寧夏遊擊將軍仇鉞內外約應舉兵將周昂擒斬何錦等捉獲寘鐺拘禁在官軍民安堵地方無事此皆仰荷宗社神靈之福皇上聖武之威將帥効忠士卒用命不逾兩旬罪人斯得若使曠日持久必至外引邊寇內扇人心為患誠難測度臣今仰遵勅旨星馳前去撫諭軍民申明號令務俾經久無事但入關以來道路相傳

京軍將至此風傳至寧夏彼反側之徒未免心懷驚疑  
恐生他患况時方盛暑迤西一帶水土鹹苦人馬易生  
疾疫其可慮不獨糜費糧草而已竊料各鎮將官必已  
將事寧緣由具奏此時廟謨必有區處若待親到彼處  
方纔論列不無耽延日月徒勞人馬但地方安危所繫  
臣責任重大不敢不言伏望聖明乞勅該部查議如果  
各鎮奏報事寧合無將京營軍馬急為取回以安反側  
之心以免供億之費不勝幸甚緣係取回京營事理未

敢擅便為此具本謹題請旨

一為擒獲同謀叛賊撫諭軍民以靖邊境等事

題為擒獲同謀叛賊撫諭軍民以靖邊境等事臣自到陝西地方節據鎮守陝西寧夏總兵官曹雄楊英各呈稱擒斬叛賊地方寧靖緣由前來訪得彼處人心驚疑未定此蓋愚昧之徒自知罪不勝誅故寬釋之詔雖降而反側之情未安臣將朝廷誅勦首惡分別脅從德意出榜差官齎去張掛曉諭一應官軍土漢人等各安職

役勿懷驚疑部領官員加意撫恤不許聽人讐言攀誣指  
濫及無辜及詢軍民疾苦禁革各衙門科擾剥害情弊  
俱通行外續該欽差總督軍務御用監太監張永訪得  
前項叛賊首惡造意者雖已斬獲其同謀黨惡者實多  
脫漏節差旗牌官楊義山王王猷谷大中等星夜兼程  
前去寧夏地方督同鎮巡等官將未獲同謀賊黨夜不  
收申居敬等五十八名陸續捉獲監候及又書寫大字  
榜文宣布皇上恩威曉諭本城官舍軍民人等俱要安

心樂業各保身家彼處人心始漸安妥本年六月十二日臣等俱到寧夏靈州守禦千戶所據寧夏鎮巡等官總兵官楊英等呈稱先獲寘鐠并的親宮眷台潛等及反賊何錦等連的親家屬并後獲同謀反賊申居敬等共四百五十五名口先解過河聽候等因臣會同欽差總督軍務御用監太監張永議照各賊未經查審恐有異詞及看得各該守臣各呈原奏本內事情多有不同會案通行帖仰鎮守陝西總兵官曹雄會同寧夏鎮守



太監張弼總兵官楊英巡撫都御史馬炳然巡按御史周廷徵督同都布按三司委官審取供詞分別造意根因首謀共謀脅從等第及行巡按御史周廷徵督同守巡官員查勘各官原奏報功次務取歸一情詞回報續該太監張據寘鐫男龔枯妻沈氏哭說被拿之時混失三歲幼男喚名老哥兒等情看係寘鐫嫡派親孫就差頭目劉奎及帖仰鎮巡等官當將幼男老哥兒尋獲見在及又看得寘鐫見患傷寒病症何錦亦患噎食病

症各令撥醫調治及宮眷人等已選良善婦人看守供送飯食各施行外為照寘鐾肆行反狀非何錦等不能起事何錦等非申居敬等同謀不能張威彼此結構為惡占據城池索要軍馬地圖殺害大臣鑄造銀印關防偽封官爵意欲內外構連侵擾邊疆幸而仰仗宗社威靈聖神妙算旬月之間盡遭擒戮所據同謀叛賊實非脅從之比若不從重處治無以示懲天下除待各賊問明將寘鐾眷屬伴送何錦等家口押解赴京并追收冊

印官服儀仗等物及追各賊家產財物籍沒入官與各鎮官軍獲功大小俱另行具奏外緣係擒獲同謀反叛賊寇及撫諭人心以靖邊境事理為此具本謹具題知

一為謝恩事

奏為謝恩事頃因寧夏賊臣何錦等叛逆臣奉勅總制陝西各路軍務前去撫諭誅勦正德五年五月三十日行至西安府乾州據寧夏差百戶蔡明赴京奏事回還齎捧節該欽奉勅諭今命太監張永總督軍務涇陽伯

神英掛印充總兵官爾就彼提督軍務統領京營官軍  
三萬員名調集陝西寧夏延綏甘涼等處漢土官軍人  
等分路進勦一同行事事寧之日星馳奏報爾仍在彼  
總制軍務欽此欽遵續該冠帶舍人楊秀領齎內府公  
文欽奉聖旨賞差往寧夏等處勦殺賊寇提督軍務都  
察院右都御史一員楊一清銀三十兩紵絲二表裏內  
大紅織金胸背獅旁一表裏該衙門知道欽此欽遵備  
云到臣除欽遵收領望闕叩頭謝恩外伏念臣本書生

不諳軍旅誤蒙簡命授以提督軍務之權重以白金文綺之賜仗天之威臣等未至地方將臣宣力士卒用命罪人斯得邊境底寧臣感恩徒切深媿無功惟當罄竭庸愚修舉邊務勉圖來効以塞厚責臣不勝感激仰戴之至緣係謝恩事理為此具本謹具奏聞

一為遵奉勅諭起解反逆賊寇事

題為遵奉勅諭起解反逆賊寇事據鎮守陝西總兵官署都督同知曹雄會同鎮守寧夏都知監太監張弼巡

撫寧夏右副都御史馬炳然鎮守寧夏總兵官署都督  
僉事楊英巡按陝西監察御史周廷徵各呈前事行據  
陝西都司等衙門都指揮僉事陳善呈會同陝西布政  
司右叅議許莊陝西按察司副使黃繡將先後擒獲何  
錦申居敬等取出責與革爵安化王寘鐸面證逐一研  
審原先起謀根因首謀共謀脅從情節及見在殺死病  
故人犯姓名明白取具備細供詞除偽封將軍銀印關  
防并封官命詞告示板榜及各犯家財產業另行外今

將取到供詞呈乞施行等因據此案查先蒙欽差總督  
軍務御用監太監張永鈞帖會同欽差提督軍務都察  
院右都御史楊一清議行前事已經會行去後今據前  
因各職恐有不的會同重取何錦等一千人證到官審  
據何錦供年四十歲原籍直隸廬州府六安州人先任  
寧夏右屯衛後所百戶招軍陞副千戶正德三年納銀  
授都指揮僉事正德元年有先未殺寧夏衛儒學生員  
孫景文黜退生員孟彬史連不時常往今革爵安化王

寘鐾府行走情熟一日酒後寘鐾向孫景文說曾有人  
相我有帝王像貌又有寄住未到師婆王九兒會跳鸚  
鵡神每神降時就呼寘鐾是老子以此寘鐾動心因  
無兵權一向延捱不得起手正德三年七月十五日有  
例納銀陞職錦與先未殺都指揮周昂借銀二百兩作  
保錦借寘鐾銀二百七十兩周昂借銀二百兩俱納級  
陞都指揮以後往來稠密正德四年八月內寘鐾使令  
未到校尉史成邀請錦與周昂孫景文孟彬史連及先



前在府唱詞無目人張會通到府喫酒間真鐸言說如  
今時世不同人民難過人說我有天分你們若肯扶我  
為主必成大事等語錦與周昂等各聽允當就對天發  
誓不許泄漏事情彼有今在官本府教授高元吉不能  
覺察正德五年正月初六日遊擊將軍仇鉞因有聲息  
領兵往玉泉營接伏本年二月內有周少卿前來寧夏  
丈量地土三月二十三日又有分守關西道侯叅議亦  
到寧夏催糧本月二十六日真鐸向錦等謀說你們拖

欠錢糧馬價數多追徵緊急人心慌亂正好乘此機會將前者所謀大事舉行人無不從但恐人少不能成事錦等聽記因思先未殺指揮丁廣千戶楊泰陳忠胡濟王輔百戶魏鎮陳賢朱霞姚鐸雷英李榮李森劉鉞何銳胡璽等多係掌印管屯管隊官員常受比較必然怨恨易於糾合錦謀令孫景文置酒將各官與孟彬及教讀殷哲請到孫景文家內會飲間孫景文說你衆人錢糧馬價無從辦納不時比較何日是了今安化王算有

天分要舉大事若肯取巧將三堂殺了扶立安化王為主必定成事我們同享富貴却不強如比較喫打丁廣等意正忿恨各稱情願等語隨即孫景文開具姓名當天焚香發誓及喫血酒就計說着安化王殿下置酒請三堂到府衆人齊來將他們殺死奪了兵權傳檄起兵有何不可謀畢衆人說好各散次日孫景文向眞鐸備說前情回報甚喜本日眞鐸思起平邊城充軍逃回千戶徐欽常在府內藏躲必肯從謀又令先未殺儀賓夏

琳親去平虜城與徐欽約謀轉約先未殺百戶朱洗舍人蔣泰程保胡英賈浩朱成王卿孫浩張閏楊舉徐愷軍人陸原保并見在張欽等到家說稱安化王要替寧夏人做主起兵差人來約我們此事有益不可推却各人亦就依聽約定下月初五日早到城當令夏琳回說三月二十九日姜總兵分付周昂挑選精銳夜不收五六十名遇警前哨殺賊周昂思得前項謀事人少正合機會於四月初三日選得在官夜不收申居敬馬官保

鎖七兒耿婆孫史三張成陳旺孫陳均生陸升保楊敬  
先龐守信鄒貴二施官得宋驢兒朱千昇陸巴子匡升  
王興古興兒任從義竇克敬韋名四孫昇保林伏進夏  
保保張成李榮關朱永年王天惠張友文郁小一馬五  
安伯狗陳拜拜陳士中郭雙孫謝官音奴張禮谷顯中  
劉文善李安子侯得朶列哥李伏二吳成林雄韓當兒  
芮和姚正楊長孫倪小弟張來兒汪成沈官兒王子厚  
先未故尤全羅漢藍真鄧全戴平共六十名著令常在

身邊跟用本日辰時寘鑪差今在官同謀百戶李蕃前去邀請三堂并周少卿假說與新來李太監接風約至本月初五日會飲初三日午時副總兵楊英因有聲息領兵往楊顯堡按伏初五日早周昂聚集申居敬等到家將大門關閉向申居敬等言說如今追併你們欠的馬錢至急今日又該比較人說安化王有福你衆人肯跟隨我扶助安化王為主得了天下你我衆人都做了大官各人忻喜承應當即取出線香一把令衆人當天

各拈香說誓及各與酒三鍾飲訖就令在家伺候隨差  
先未死夜不收藍真前來與錦說知錦就使令未到周  
全保前去請丁廣孫景文胡璽分投相約楊泰等俱至  
周昂家內取齊周昂等又計說今在官指揮張欽係管  
夜不收把總官若不用他恐有後害就令魏鎮前去賺  
請張欽亦到周昂家內備說前情張欽依從真鑄復差  
李蕃前來周昂家內言說止請得姜總兵李太監鄧監  
鎗到府其餘不來是錦同周昂丁廣等佯言要出兵截

殺各帶家人伴當并申居敬等各披執軍器將各巷口  
把住寘鐺令先未殺本府儀賓高嵩夏琳千戶王環家  
人王保并孟彬殷哲與先未故高聰男高士俊今在儀  
賓韓廷璋各藏兵器先在殿後埋伏及令今在官知情  
內使姚玉施恩田成韓宣王堂在傍隨侍彼有令在儀  
賓謝廷槐來府伺候方纔知覺事已窘迫只得在傍答  
應使喚寘鐺先與各官把酒序坐間錦等領前項夜不  
收人等到於安化府前一齊撲入殿內錦與高嵩等各



執鐐刀裏外相合丁廣并弟丁二哥子魏鎮將姜總兵  
砍訖二刀不死錦照頭臉再砍一刀方死高聰高士俊  
高嵩王保將李太監殺死高嵩高聰又與楊泰姚鐸將  
鄧監鎗殺死錦同周昂丁廣當率官軍前去都察院又  
與姚鐸陳賢胡璽將安都御史當堂殺死正遇都指揮  
楊忠在院稟事亦被周昂丁二哥子殺死史連同未到  
指揮馮經并先未殺舍人馮濟未到閤添孫等一齊到  
按察司前將周少卿同書吏屠成岳寧三人殺死雷英

姚鐸申居敬等到鼓樓街遇都指揮李睿亦就殺死魏鎮王輔又到公議府尋殺侯叅議正遇大使張璵在內稟事并與書吏董良佐一同殺死書吏杜緒劉尚禮殺傷侯叅議知覺脫走錦當時差人將各監重囚四十四名盡數脫放又將各衙門文卷盡行燒毀又將閒住曲都御史并妻子砍傷及各官原領制勅符驗印信關防旗牌家財人口盡行搶去不知名軍人夜不收亦乘亂混搶又令李森將黃河官私大小船并魚船共一十七

隻掣去橫城西岸灣泊委未殺充軍百戶姜永看守本  
日指揮尹清都指揮劉端慮恐禍及急走出城前去楊  
顯堡報與楊副總兵知會初六日侯叅議被鎮撫楊剛  
尋獲捉送寘鐫處本官不肯屈服綁送寧夏左衛監禁  
言說留着祭旗及有管糧張通判亦被捉去安化王府  
內強逼使用本日錦與周昂等率衆扶立寘鐫為主朝  
暮朝拜聽其命令寘鐫令孫景文寫告示張掛以收人  
心又寫令旨二道并錦等書二封差未到鎮撫陳淮百

戶阮宣調取楊副總兵仇遊擊前來聽用各官收訖前  
項令旨書信心實不從當日楊副總兵分付官軍要往  
王宏堡彼有都指揮胡顯并各軍士陸續潰散走回寧  
夏城內及將旗牌賈欽祖亂打身死楊副總兵無奈只  
得與尹清往廣武營轉渡靈州去訖本日仇遊擊領軍  
回城寘鐺令伊卸去衣甲什物等件方得入城後將原  
領遊兵人馬分散各隊本日寘鐺又出令旨帖子與姜  
永今在男百戶姜忠管河西關遞運所兼管二十六堡

又寫令旨五張調取中衛廣武興武花馬池靈州等處  
兵馬地圖及調官軍前來領賞本日未時儀賓夏琳原  
約平虜城官舍徐欽等一十三名方纔到城內有張欽  
一名不到寘鐺嗔恠來遲苦告路遠饒了初六日寘鐺  
要動支寧夏倉官銀賞軍當有張通判說留在後用不  
曾支去却將寧夏等五衛賞剩冬衣布花銀兩查出聽  
賞又差高嵩去慶府并各郡王將軍人等逼要金共五  
百二十六兩六分銀八千四百八十四兩九錢各色紵

絲四百四十一疋各色紗一十一疋各色大絹一十五疋青白三梭并藍白布共一千九百四十二疋各色紵絲紗羅衣服八件金合包一箇到府聽賞官軍初七日守備靈州都指揮史鏞聞知前情差夜不收李得等分投馳報鎮守陝西曹總兵官并各路將官知會本日寅鐘令未到銅匠楊茂鑄銀關防一顆令未到刊字匠王得洪篆討賊大將軍關防字樣在上先未死銀匠王時雍剔鑿篆文又偽造黃令旗二十面又令孫景文寫告

諭王得洪刊板印刷四五百張散與各處行人傳示腹裏地方警動人心彼有百戶鍾翊陳倣為因強剥姜總兵家眷衣服夜不收羅漢為因強搶財物俱被寘鐸得知拿來梟首初八日早寘鐸將前項脅要慶王等府金銀緞布等物賞犒官軍人等每官一員賞段一疋每征操軍夜不收一名連金布等項折算賞銀二兩守城軍每人賞銀一兩本月十二日寘鐸封錦為討賊大將軍就掛前項偽造關防封周昂為左副將軍丁廣為右副

將軍張欽為前鋒將軍魏鎮陳賢楊泰胡璽陳宗王輔  
胡濟各為都護朱霞朱洗姚鐸雷英李榮李森王環劉  
鉞何銳姜永各為總管封李蕃為儀副就頒命詞二十  
二張見在二張其餘不存前項偽官又每人加賞銀有  
二三十兩者有十兩者錦因夜不收羅漢被殺藍真自  
縊尤全鄧全戴平陸續病故又選今在王得成子伏佑  
尤千頂補尤千即係尤全親男王得成子伏佑不係原  
謀人數本月十三日曹總兵督發都指揮黃正帶領遊



兵官軍二千四百餘員名前到靈州駐劄及節行楊副  
總兵調集靈州官軍設法邀取船隻巡把黃河隘口本  
日巡按周御史在延綏聞知前情會同榆林三堂議調  
副總兵侯勛遊擊將軍時源等五千餘員名前來策應  
十四日早有楊副總兵黃正史鏞并都指揮韓斌等帶  
領遊兵并靈州土漢官軍共三千餘員名到河東關地  
方順河一帶劄隊又選差官軍中會水手者共得鎮撫  
溫良等二百餘員名渡河將看船官軍射走奪取原船

一十七隻及軍器等件掣過靈州東岸本月十五日寅  
鐘猶恐前該五十八名夜不收不肯用心又將官銀三  
百兩令周昂給賞夜不收尤干等并不記名丁廣伴當  
一十四名共七十二名當令跟隨魏鎮張欽等齎銀二  
扛先去廣武營給賞以收人心本月十七日晚有廣武  
營協同都指揮僉事孫隆蒙曹總兵官帖差人將大小  
二壩積垛捲埽柴草盡數燒毀有魏鎮張欽等到於廣  
武營城門宣言散賞緣由勒要開門孫隆不納只登城

宣言禍福利害隨令官軍齊用日箭補鎗射打有魏鎮  
張欽等帶領人馬復回大壩本月十八日楊副總兵史  
鏞韓斌照依曹總兵原行寫書一封令仇遊擊家人仇  
書童等密齎渡河潛到寧夏城遞與仇遊擊約令裏應  
外合共舉大事本日姜永令在官王泰劉雄臧文前去  
花馬池等處探聽延綏軍馬消息被把門官盤獲送閤  
叅將審明解送楊總兵交收本月十九日有寘鐸向錦  
等說稱訪得各路人馬已在中衛廣武靈州等處沿河

堵截大小二壩柴草俱各燒毀船又奪去誠恐它開壩口水來難堵又恐渡口人馬過來你們如何處置錦等計議未定二十日曹總兵領軍親到靈州本日有錦等差去巡河軍人報說瞭見黃河南岸人馬灰塵約長三里往西行走寘鐸愈加驚懼當差錦同丁廣張欽楊泰胡濟魏鎮胡璽李森陳賢劉鉞何銳姜永等統領馬步官軍都指揮鄭卿等二千員名錦等分領一千五百員名前去大小二壩防守又分與劉鉞姜永等人馬五百

前去渡口去處把截止留周昂在城防守本月二十一日周昂差徐欽去平邊城調軍馬一百名來寧夏聽用本月二十三日早有寘鐸出城祭祀社稷旗纛等神使人喚仇遊擊陪祀仇遊擊設計推病不出周昂自來看望仇遊擊就乘機密令伴當陶斌將周昂抱住仇遊擊同家人來得用鐵骨朶打死周昂割下首級即開門吹號頭招喚原約遊兵親信官軍楊真等一百餘人前去寘鐸府內將朱霞王環姚鐸李榮孫景文史連孟彬高

嵩夏琳雷英陳宗俱殺死又將李蕃張會通并儀賓謝廷槐韓廷璋擒獲及將真鐸并宮眷拘繫在官侯叅議疎放就差軍人荀子先馳報曹總兵等處又差夜不收古興兒馬保前去大壩堡向錦等詐說敵衆大舉從赤木口入境攻圍西門今傳令旨調錦等領兵回城截殺是錦等聽信即發兵起行有古興兒暗說前情與鄭卿知會鄭卿隨即布置所部官軍張特默鮑本魏文輕執刀將胡濟胡璽魏鎮陳賢李森殷哲胡英又到河口將

巡河劉鉞姜永何銳等俱殺死斬首錦與丁廣張欽王  
輔楊泰脫走錦原掛討賊大將軍關防倉卒遺失本日  
徐欽帶領原調人馬一百名前來寧夏見得城門關閉  
得知周昂等被誅隨即帶領人馬復回行至中途姚福  
堡仇遊擊差人連夜到平邊城着落王指揮差人復到  
姚福堡止將百戶朱洗殺了其餘軍馬回城徐欽逃走  
不知去向有在官周升長陳敬祖係徐欽伴當止知跟  
馬不知別情因徐欽逃走拿解寧夏收監二十四日錦

與丁廣楊泰王輔走到賀蘭山外地名哈喇木墩被遊  
兵百戶馬聰土達馬旺金寬夜不收陸華等將錦與丁  
廣捉鎖前來楊泰王輔俱被衆軍亂箭射死張欽逃走  
本日楊總兵領軍過河本月二十五日百戶姜忠被百  
戶李英弟姜恕被指揮張德各捉獲本日曹總兵領軍  
過河鄭卿等各將錦等送赴曹總兵處審實發監本日  
晚張欽飢餓難行復回大壩河口空廟內避躲後又潛  
到陳俊堡被本堡老幼軍人劉銳捉獲間分守馮叅將



帶領官軍亦到彼處捕捉張欽劉銳就將張欽送與馮  
叅將轉送曹總兵處發仰寧夏前衛監候隨於安化府  
尋獲姜總兵原領符驗一道征西將軍銀印一顆安都  
御史原領勅諭符驗各一道關防一顆後交與新任鎮  
巡官收掌又尋獲寘鐸偽造見在黃令旗一十六杆紅  
令旗六杆令牌一十面誓牌一面命詞二紙陰陽等兵  
書一十七本曹總兵先已奏繳其寘鐸鍍金銀印毀壞  
鍍金冊八塊儀仗冠服家財并錦等財產見在者收檢

在官實鐫其餘家財等項俱被寧夏官軍人等乘亂搬  
搶無存見今行文挨究其餘未盡施恩等挨拿間五月  
十九日蒙欽差總督軍務張太監先差管領神鎗太監  
陸閭帶領旗牌官楊義山玉王璵等三次前來續又親  
統官軍人等督令各官陸續將施恩張欽輔國將軍齎  
材夜不收申居敬馬官保鎖七兒耿婆孫史三張成陳  
旺孫陳均生陸升保楊敬先龐守信鄒貴二施官得宋  
驢兒陸巴子朱千升匡興古興兒子伏佑王得成任從

義豆克敬韋名四孫升保林伏進夏保保張成李榮關  
尤全朱永年王天會張友文郁小一馬五安伯狗陳拜  
拜陳士中郭雙孫謝官音奴張禮谷顯中劉文善李安  
子侯得朵列哥李伏二吳成林雄韓當兒芮和姚政楊  
長孫倪小弟張來住汪成沈官兒王子厚五十八名生  
擒程保賈浩王卿楊舉蔣泰張閏徐愷朱成孫浩陸原  
保十名斬首家屬安化王孫老哥兒及各犯家屬賈洪  
等一百七十名口拘獲在官本月二十八等日首惡丁

廣同謀高士俊并家屬賈九兒賀氏李氏張欽幼女賈  
浦周小女賈七兒何童生何哇子李氏劉達蔣瘦兒蘇  
氏姚氏徐氏王氏子氏張氏謝玉王二哥陳氏張氏二  
十四名口陸續在監患病身故相埋明白蒙總督軍務  
張太監按臨同提督楊都御史案行陝西曹總兵寧夏  
鎮守張太監巡撫馬都御史楊總兵官巡按周御史轉  
委黃副使許叅議陳都指揮吊取錦等再三研審會勘  
明白內儀賓謝廷槐因是安化王孫婿逼脅在彼服侍

委的不知反情軍人周升長陳敬祖因是逃犯徐欽伴  
當捉來委的不曾同謀今蒙審供不能隱諱取供是實  
張欽等七十四名各供與何錦供同據此理合備由呈  
乞施行等因到臣查得欽差總督軍務御用監太監張  
節該欽奉勅諭先命爾統領京營官軍前去寧夏勦  
殺反賊近得延綏鎮巡官太監孟山等并巡按陝西監  
察御史周廷徵各奏據今陞寧夏總兵官署都督僉事  
楊英陝西總兵官署都督同知曹雄等報稱四月二十

三日已時令陞副總兵都指揮僉事仇鉞合謀內應將首惡何錦周昂丁廣張欽等俱各擒斬今革爵寘鐫擒獲地方安妥各鎮兵馬俱已掣回去訖今特勅爾仍到彼處會同提督軍務都御史楊一清督同鎮守太監張弼總兵官楊英巡撫都御史馬炳然御史周廷徵等將寘鐫選委的當官員伴送爾仍同張弼入府將寘鐫的親家屬宮眷人等并何錦全家人口牢固枷釘一同押解來京以憑處治務要關防嚴謹毋致疎虞其寘鐫冊

印冠服儀仗等物就彼追收起解各賊財產督令鎮巡等官籍沒入官慶王及各郡王將軍人等尤宜詳處以存親誼其脅從人等俱照節行詔旨查審釋放仍通行撫諭各該官員軍校人等仍其職役各安生業以定人心以靖邊境悉聽爾斟酌議處便宜行事爾其體朕至意以副委託事畢之日爾即星馳回京欽此欽遵外臣本年六月十二日到寧夏地方節據總兵官楊英等呈稱見監并殺死寘鐸何錦等及今獲共謀反賊申居敬

等連各賊家屬共四百五十五名口到臣會同欽差總督軍務御用監太監張永議得各賊未經查審恐有異詞已經會案通行帖仰陝西寧夏二鎮太監總兵巡撫等官巡按監察御史督同都布按三司委官審取供詞分別造意根因首謀共謀脅從等第呈來以憑覆審遵奉欽依起解釋放去後今據前因除覆審相同外臣會同太監張永議照革爵安化王寘鐸係宗室懿親犯何錦張欽等皆朝廷臣子世受國恩罔思報稱乃敢潛



謀交結肆行反逆迫脅官軍占據城池殺害鎮巡重臣  
索要軍馬地圖鑄造關防偽封官爵傳檄邊境搖撼人  
心意欲結搆外寇併謀侵犯中原實地方非常之變覆  
載不容之賊也幸賴我祖宗厚德深仁皇上神謀妙算  
邊將宣力諸軍用命元惡首授餘黨成擒祖訓昭然憲  
章具在臣等固無別議伏覩節該欽奉勅諭除首惡何  
錦等三人不宥外脅從之徒果係迫脅為亂者悉與釋  
放毋得濫及無辜欽此欽遵仰見我皇上好生之德配

合天地故雖窮凶極惡之人尚垂矜貸臣等敢不祇承  
德意緣構亂之時寧夏本城官軍士庶人等仰面事讐  
相率朝賀接受賞賜聽從使令綱常為之蕩然名教為  
之掃地言之痛心切骨但干碍人衆遵奉明詔分釋脅  
從悉皆放免關過賞賜亦不追究其後獲人犯夜不收  
申居敬等一聞周昂逆謀即有樂從之意殺人劫財乘  
機為亂當虐炤方張之時實此輩黨惡所致若欲比諸  
脅從之流則情重法輕非禁奸止亂之道但舉事之日

方纔預謀義兵一動當即戢止比之元謀首惡似有不  
同數內古興兒初雖克黨後乃聽受仇鉞使令傳話鄭  
卿捉賊若有去逆效順之意尤千係尤全親男王得成  
于伏佑係事後選補俱非原謀之數比之申居敬等又  
似不同平虜城官舍徐欽程保等一十一名聽信夏琳  
之調相從謀逆之舉路自外來情非迫脅但伊事後方  
纔入城不曾相助殺掠除徐欽脫逃正犯程保等十名  
俱已誅斬其家屬丁口與申居敬等家屬俱各拿獲發

仰寧夏靈州等處監候奏請定奪及照安化王府儀賓  
謝廷槐雖不知情係實鑄孫婿難以獨留故土教授高  
元吉職在輔導顛而不扶焉用彼相通合解京發落再  
照事內納粟都指揮僉事胡顥領軍在外不顧諸將倡  
率士卒潰散回城寧夏左屯衛所鎮撫陳淮百戶阮宣  
聽齋偽旨召調將官寧夏前衛鎮撫楊綱奉承賊意尋  
捉分守官員揆以春秋誅心之法難照常人脅從之例  
管糧通判張江本以章縫之流忍聽逆賊之用情雖出

於脅從義則難齒仕籍臣等所見如此伏望聖明大奮  
乾斷乞勅廷臣會同三法司詳議除何錦等正犯外合  
無將申居敬等明正典刑梟首於寧夏地方示衆其家  
屬丁口與程保等家屬俱免解京就彼押發南方烟瘴  
地面充軍隨住庶使情法兩盡可以警戒將來古興兒  
等四名應否俯從輕典并見解儀賓謝廷槐教授高元  
吉在任都指揮胡顥所鎮撫陳淮百戶阮宣衛鎮撫楊  
綱通判張江等通併原情議法奏請明示竄謫庶幾少

存無將之戒用防不道之萌臣等又竊思皇上御極以來何負於宗藩何負於武臣而寘鐫何錦等忍為此事以厯宵旰之憂若一槩從寬不究誠恐釀成姑息之風重貽將來之害唐末覆車可為明鑒况好生者天子之德執法者人臣之義義有不共戴天法固難於寬縱此外果有原謀及殺人重犯待後事發明白具奏施行及照各犯脫放見監重囚四十四名燒毀各衙門文卷中間恐有別弊亦合挨究處治及寘鐫冊印冠服儀仗地

土何錦等財產及遺失勅印關防財物等項俱另行為  
此今將各項人犯除先已誅斬病故及監候外脫逃未  
到徐欽王九兒等各拿解無干周升長等各釋放見在  
寘鐫等連的親眷屬并何錦等各家屬分作三起差委  
陝西寧夏都指揮黃正鄭卿等管領官軍伴送押解其  
宮眷仍選取良善婦人看守供送飯食沿途軍衛有司  
添撥軍兵民快防護到京奏請定奪外緣係起解反叛  
賊寇事理為此謹題請旨

一為災傷事

題為災傷事節據寧夏左右前中護等衛左右中前等  
千戶所百戶李旻常泰等下屯種軍餘畢政朱選等各  
連名告稱本處地方去歲蝗蟲生發食傷田苗不得收  
成正德五年四月以來各人布種夏田麥豆正當長茂  
結實之時天降靈雨連綿不絕熱氣濕蒸以致小麥生  
舟枯死豌豆亦被一蟲食傷大麥粃細無收見今軍民  
難過各家老稚男女尋挑野菜充飢度日切思徵糧在



邇無從措辦告乞分豁等因到臣已行鎮巡衙門勘驗所告虛實災傷輕重明白行來以憑會處具奏去後未報臣親詣前項地方督同各該大小官員再三詢訪委的寧夏一鎮連年為因徵科繁急人民已是困敝去歲夏秋田苗蟲傷今年被反賊殘害加以敵衆不時入境搶掠愈加狼狽臣偕鎮巡等官宣布德意極力撫綏猶恐不能安業不料又遭霪雨虫傷收成無望若再追徵稅糧救死扶傷之人奄奄喘息其何以堪未免逼令逃

竄將來事變猶有可憂如蒙伏望聖慈憫念極邊地方  
傷殘困苦軍民乞勅該部計議上請合無不拘常例覈  
勘特降綸音將寧夏一鎮前項該徵夏糧早為蠲免除  
豁以安人心以靖地方不勝幸甚緣係邊方災傷事理  
未敢擅便為此具本謹題請旨

一為更易主將以撫安人心保障地方事

題為更易主將以撫安人心保障地方事臣節該欽奉  
勅事寧之日仍要更易部領申明號令俾其經久無患

欽此欽遵照得寧夏經變之後反側未安政務懈弛將欲一新號令全在部領得人除將各該領軍坐堡掌印管屯等官會同鎮巡從公推訪委用應更調者更調應黜革者黜革各施行外竊見新任總兵官署都督僉事楊英素諳邊務亦善治兵比歲追勦敵衆多有斬獲但初為副總兵領軍在楊顯堡按伏一聞何錦等搆亂所統官軍潰散回城不聽約束致將旗牌賈欽祖打死本官只得罄身同指揮尹清奔往廣武隨即過河奔至靈

州其後資藉曹雄史鏞黃正韓斌諸將兵力邀取船隻  
卒成桑榆之功彼時朝廷因見鎮巡官員俱被殘害就  
近推擢俾總戎務固為相應但本官喪失之餘士心不  
附蹤跡孤危欲御之以嚴則猜忌轉深欲撫之以寬則  
委靡不振臣自到寧城以來耳聞目擊衆口沸騰委的  
難以行事且極邊重鎮大亂初平撫定安輯全賴鎮巡  
仰惟皇上神謨妙算洞見萬里近日擢用新任官員如  
太監張弼之安靜不苛都御史馬炳然之廉平得體叅

將保勩之志節兼優遊擊史鏞之才畧出衆副總兵仇  
鉞世守武臣威名素著近又新建奇功一方兵民倚以  
為重凡此皆極一時之選而主將之任機要所關尤在  
得人況今山後之敵勢方張河套之情形未定遇警調  
度殺敵正係總兵之事傳曰地利不如人和身為主將  
坐失人心鋒鏑之間小有動搖誠非細故但人才難得  
如本官者用之寧夏固非所宜用之他鎮則無不可伏  
望聖明俯念邊方事重乞勅兵部再加訪察議擬上請

合無將楊英取回京營或改調別鎮另推謀勇著聞士  
心素附邊將一員代總戎務與張弼馬炳然等各久任  
責成庶幾兵政一新經久無患臣責任重大苟有所見  
不敢緘默緣係更易主將以撫安人心保障地方事理  
未敢擅便為此具本謹題請旨

一為撥補軍伍以實邊備事

題為撥補軍伍以實邊備事據寧夏鎮巡等官太監張  
弼等呈會議得本鎮興武營新設守禦千戶所該設旗

軍一千餘名今止有官軍四百一十五員名況本所極  
臨邊境外控河套內與花馬池清水營聲勢連絡防禦  
邊敵係是衝要緊關去處必須軍馬數足易於防守今  
查革爵安化王府原有隨侍百戶李蕃一所總旗二名  
小旗十名軍人一百名內除百戶李蕃同謀叛逆已就  
誅戮及逃故軍士九十一名外見在總旗二名小旗十  
名正軍七十九名餘丁成丁一百八十四名不成丁一  
百一十七名相應撥補合無將前見在旗軍盡數改撥

興武營守禦千戶所當軍食糧餘丁亦隨營居住貼軍當差逃故二十一名行文原籍清勾前來本所補伍呈乞轉奏施行等因到臣會同欽差總督軍務御用監太監張永議得寧夏東路花馬池興武營二處俱係極邊沙漠敵衆入寇中原必由之處為因軍伍單弱先年往往失利已該臣一清總制邊務之時奏請將花馬池千戶所改設寧夏後衛興武營改設守禦千戶所各添撥軍人住種防守今花馬池已添新軍五千餘名似勾保



障惟興武營止撥到充發等項軍人數又不敷隨到隨逃不得實用武備依前單弱誠恐將來再敢窺伺侵犯少有失利貽患非輕今據鎮巡等官太監張弼等呈乞具奏要將革爵寘鐫遺留隨侍一百戶旗軍改調前項地方充軍以實邊伍一節委的相應臣親在寧夏地方詢訪相同故敢冒昧上陳伏乞聖恩憫念極邊重地方守為急乞勅兵部議處合無將寘鐫隨侍一百戶所旗軍盡數改撥興武營守禦千戶所當軍食糧餘丁亦隨

營居住貼軍當差逃故之數行文原籍官司清勾前來  
本所補伍以嚴武備以壯邊城用消將來窺伺之患非  
惟邊方有幸實亦陝西腹裏軍民之福也緣係撥補軍  
伍以實邊備事理未敢擅便為此具本謹題請旨

一為分別將官功過事

題為分別將官功過事行據巡按陝西監察御史周廷  
徵呈稱奉臣等帖仰會同都布按三司委官即便吊查  
各該鎮巡等官各奏本內事情務取歸一何官發蹤何

官運籌制勝領何項人馬得獲前功作急呈來以憑具  
奏毋得回護奉此遵奉會同陝西都布按三司都指揮  
僉事陳善叅議許莊副使黃繡調取陝西延綏寧夏鎮  
巡等官曹雄等節次題奏過平定反賊何錦等始末案  
卷并節據各該將官開報手本查得正德五年四月二  
十八日據延綏總兵官馬昂差總旗紀順口報有領軍  
見在靈州等處截殺副總兵侯勛遊擊時源差人報稱  
反賊安化王并丁廣等被本鎮遊擊仇鉞等捉獲周昂

自刎身死何錦走出大壩有總兵官曹雄等計議進城  
平亂等情該職看係捷音除具題訖五月初三日又准  
總兵官馬昂手本開稱有寧夏副總兵楊英差靈州夜  
不收張道同口報有反官何錦丁廣領了三千人馬往  
大壩看守不在本月二十一日楊英密地差人齎書與  
遊擊仇鉞二十三日仇鉞將首惡周昂等殺了捉了安  
化王二十四日楊英會同叅將閻綱協同守備都指揮  
黃正保勅史鏞各領兵馬過河等因該馬昂會同鎮守

太監孟山巡撫都御史黃珂看係鄰土捷音亦各將情  
具題及用手本備行到職又查得五月初八日據今陞  
副總兵仇鉞手本開稱正德五年二月初一日先該鎮  
守總兵官姜漢等會議手本為聲息事行移鉞統領遊  
兵三千員名分布迤西大壩玉泉等營副總兵楊英統  
領奇兵三千員名分布楊顯等堡各按伏四月初五日  
有寧夏都指揮等官何錦周昂丁廣同安化王寘鐸叛  
逆將太監李增總兵官姜漢少監鄧廣請去飲酒何錦

等帶領同謀指揮千百戶張欽等將李增等殺死何錦等又去各衙門將都御史安惟學少卿周東都指揮楊忠等亦各殺死及將各官原領制勅符驗印信關防旗牌家財盡行搶去無存分守叅議侯啓忠知覺脫走次日尋獲肘鐐監禁管糧通判張江亦被捉拿拘收倉庫鎖鑰燒毀各衙門文卷簿籍脫放見監罪囚掣取渡河船隻安化王偽設官職本日何錦賺調鉞等兵馬至初六日領兵到城楊英逢遇指揮尹清同去廣武渡河靈

州駐劉安化王何錦等又將慶府并各郡王將軍中尉家財逼索散軍節出令旨榜文扇惑人心鉞欲要召人刺殺但原領兵馬先被何錦等盡行拆散不容一人跟隨外無援兵恐獨力難成本月初八日得報總兵官曹雄統兵前來征勦先發都指揮黃正遊兵三千靈州住劄行令黃正與副總兵楊英守備史鏞等撥人沿河巡邏設法邀取船隻十四日楊英等領兵先用馬步水手二百餘人齊渡過河與何錦等原差看船官軍百戶姜

永等對敵奪獲大小船一十七隻軍器等件本月十八日鉞家人仇書童在於靈州看收同尹敬等回還密藏副總兵楊英等書信准總兵官曹雄手本行移鉞召集義士約期裏應外合又令協同孫隆將大小二壩草垛燒毀及調集陝西各路兵馬并東西叅將等官閭網保勦等大軍於二十日俱至靈州叅將馮禎協同孫隆官軍前來大壩臨近城堡駐劄何錦等心生懼怯二十二日總兵官曹雄發把總指揮李禎等下官軍一千員名



順河前去鳴沙州駐劄有河北巡視百戶姜永瞭見灰塵走報安化王議令何錦丁廣等領兵前去拒守大壩周昂在城護守鉞乘虛密切分付都指揮鄭卿等在外擒捉鉞在城密令心腹官舍家丁人等召撫官軍在家潛伏二十三日鉞詐病睡床周昂前來看望鉞撲出用刀將周昂亂砍身死領人前去將安化王并同謀將軍儀賓人等陸續擒斬拘羈又密差人前去大壩通知鄭卿等督軍就將何錦丁廣魏鎮等擒斬張欽等脫走及

將黨惡家屬捉拿監候二十五日總兵官曹雄統兵前  
至寧夏城鄭卿等捉送何錦等赴軍門督同鉞等安撫  
軍民人心妥貼地方寧靖等因又查得先准鎮守陝西  
總兵官曹雄并寧夏副叅守備等官楊英閻綱保勳史  
鏞等各手本及各官奏題過本案卷內開報擒斬何錦  
等緣由逐一查對明白俱與仇鉞先報手本內情節亦  
各相同又查據寧夏叅將馮禎手本開稱六月初三日  
禎於寧夏城領兵回至陳俊堡訪知首惡反賊張欽脫

逃在堡親督官軍將張欽拿獲解送總兵官楊英處監候等因近又查准寧夏總兵官楊英手本開稱蒙欽差總督軍務御用監太監張永見得寧夏黨惡未盡地方未寧三次差遣指揮旗牌等官楊義山王王璵各授以成算齋捧鈞帖榜文前來寧夏指示鎮巡等官一遵號令將未獲同謀黨惡申居敬等六十二名程保等一十名俱各擒斬及將各犯家屬俱捉監候等因亦報前來查勘間今奉前因除將有功大小人員另行造冊奏繳

外今將查勘各官奏題過擒斬反賊何錦并革爵安化王寘鐸父子人等始末來歷并各官功次輕重緣由理合具呈施行等因備呈前來案查先為前事看得各該守臣各呈原奏本內事情多有不同會案通行巡按御史周廷徵督同守巡官員查勘各官奏報功次事情務取歸一以憑具奏去後今據前因會同欽差總督軍務御用監太監張永議得寘鐸何錦等背棄天常謀為不軌窮其逆志未可窺測皇上命將出師聲罪致討雖鼎

魚假息不過斯須然兵刃所交未免玉石俱焚轉輸之苦復恐財力兩竭幸賴皇靈丕振聖武布昭各鎮將官同心協力旬月之間坐收偉績已蒙聖恩或賜勅獎勵或就為陞擢勸忠之典可為曲盡臣等切思各官勲勞有大小功過有多寡奏報之言未必皆實叅評周廷徵所呈固已得其情狀臣等復加廣詢博訪方悉其真看得鎮守陝西地方總兵官右軍都督府署都督同知曹雄以鄰境主將聞變奮興分布腹裏人馬拒守要衝徵

調鄰境官軍揚兵討伐邀取船隻以絕渡河之謀榜示禍福以攜脅從之黨指畫以通仇鉞則內應克成權宜以用韓斌則土人斯附增中衛廣武之兵以捍其所欲攻燒大壩捲埽之草以攻其所必救凡此調度皆合機宜遂使叛酋倉皇而出義兵乘虛而起較其發蹤指示之功實出斬將搃旗之右遊擊將軍今陞副總兵都指揮僉事仇鉞賺調入城跡雖可議潛謀結義心實靡他既而手斬元惡逆黨寒心襲執叛王闔城生氣奮臂一

呼罪人盡得原情不失為忠論功何止掩過此二人者  
平亂之功當為一等但曹雄則有功而無過仇鉞則過  
少而功多分守寧夏東路右叅將今陞副總兵都指揮  
閻綱協同分守興武營今陞右叅將都指揮僉事保勣  
分守寧夏西路左叅將都指揮僉事馮禎協同分守廣  
武營都指揮僉事孫隆守備靈州今陞遊擊將軍都指  
揮僉事史鏞寧夏都指揮僉事韓斌陝西都指揮僉事  
黃正皆能嚴兵固守以繫忠義之心約期進勦以奪梟

雄之氣內保勩及寧夏右衛指揮僉事尹清各有祖母  
妻子在於鎮城不卹私家堅守臣節尤為可嘉寧夏都  
指揮僉事鄭卿始雖曲從逆賊之用既乃卒成擒賊之  
功協守延綏副總兵今陞總兵官署都督僉事侯勛延  
綏遊擊將軍都指揮僉事時源遠提策應之兵實為聲  
援之助凡此數人論平賊皆與有勞語効力不能無異  
再照寧夏副總兵今陞總兵官右軍都督府署都督僉  
事楊英釀鎮城之禍而先機失於禁防督邊堡之師而



聞變不能約束大呼而潰三軍之心已離奉身而逃七尺之軀僅免但其後約會諸將協謀討叛奉承法令擒賊數多斯亦不為無功要之不足掩過其餘有功官員多係聽從驅使臣等不能悉數除待巡按監察御史勘明照例造冊奏繳外今將查勘詢訪過緣由具實開奏伏望聖明省覽乞勅該衙門查照施行緣係分別將官功過事理為此具本謹題請旨

一為議處宗藩以防患將來事

題為議處宗藩以防患將來事臣到於寧夏地方詢問  
官僚士庶軍民人等皆云革爵安化王寘鐸叛逆之時  
逼脅慶王日逐隨衆朝見跪拜從右門而入行君臣之  
禮將欽賜寶纛儀仗送與僭用又逼要金銀器皿等物  
一萬餘兩賞勞叛軍此固寘鐸挾持叛將假借兵威迫  
之使然情非得已而冠屨倒置亦甚矣及訪得寘鐸平  
昔善營市利交通賓客又聽張會通王九兒等在府往  
來信其邪說妄生異志何錦等與之往來情熟貸其財

以納級資其勢以害人鎮巡三司等官又多被其延接  
納其餽送動以賢王稱之此既不復禁防彼益肆無忌  
憚醞釀以成大禍蓋非一朝一夕之積言之可為痛心  
臣仰惟我太祖高皇帝建立宗藩分布天下即成周大  
封同姓之意用以控制中外藩屏邦家凡親王建國之  
處郡王將軍以下皆其所統無事不聽其裁處無人不  
歸其約束凡有奏請事情皆須具啓親王與之轉達成  
法昭然千萬年之所當祇承而不敢失墜者也當寘鐫

反狀未露之時慶王若能先事禁防必不容其交通兵將邀結人心以成大亂及寘鐸反形已露之後慶府護衛儀衛司工正郡牧等所不下數千人若能仗義整兵嚴備以待密諭諸王共圖討賊播告鎮城官軍使之協心宣力戡定禍亂豈無忠義之士應召而興計不出此顧乃甘心屈辱聽賊指使致將朝廷法物棄而不保又終無一言奏報殊負皇上展親之仁有失諸侯維藩之義其輔導官員豈得無罪臣等又竊聞各處宗藩與文

武官員交結往來及招誘邪說之人在府恣肆出入者  
比比有之履霜堅冰漸不可長近者鎮巡之禍起於府  
第盃酒之間可為殷鑒伏願皇上念祖宗創業之艱難  
思今日守成之不易存大義於親親之內謹事機於未  
發之先合無降勅慶王少示警戒其內外輔導承奉長  
史等官亦合提解赴京明正其罪別選相應官員代補  
其任仍申明舊章通行天下王府但有如寘鐫私通賓  
客交結文武官員及招誘陰陽術數一切左道邪說之

人在府出入往來者即便痛思改過嚴加禁絕親王建國去處郡王以下悉聽約束郡王建國去處將軍以下悉聽約束如有前項違犯事情輕則懲戒禁止重則具實奏聞區處除既往不究外將來不行悛改事發大義滅親不宜輕恕輔導官員不能匡正又隱匿不行具奏者提解赴京從重處治內外文武官員所過地方止許朝見親王其郡王獨自治國去處方許朝見此外敢有似前與郡王將軍中尉儀賓等府盃酒往來接受餽送

禮物者拿問治罪罷職不叙如此則界限分明禮法嚴整邪人無由而接則邪念無自而生非惟地方之幸亦宗藩之福也臣等切見皇上嗣位以來於天下王府禮義隆洽過於先朝而寘鐸乃敢負義背恩構此大變不勝忠憤激切故敢冒昧上言緣係議處宗藩以防患將來事理未敢擅便為此謹題請旨

一為遵奉勅諭起解後獲反逆賊寇事

題為遵奉勅諭起解後獲反逆賊寇事據寧夏鎮巡等

官太監張弼都御史馬炳然總兵官楊英御史周廷徵  
各呈為衆官反逆殺死鎮巡大臣事將後獲馮經等取  
出會同重複審據馮經供年三十六歲寧夏左屯衛指  
揮僉事管屯正德五年四月初三日有已故指揮丁廣  
請經在伊家飲酒彼有何錦等三十餘人同飲是經問  
這酒因何有何錦回說你到初五日跟我去便知等語  
各散次日有今在官徐文孝故兄充軍千戶徐欽與已  
解何錦已殺周昂已故丁廣同革爵安化王寘鐸謀反



差已殺儀賓夏琳去平邊城謀約徐欽等一十二人前來舉事各允本月初五日經在巡撫察院稟事只見丁廣等帶領人馬入院將安都堂楊都司殺死經纔知謀反事情丁廣就叫經去殺清理屯田周少卿比時經因恨周少卿比較要增屯地當就取刀同到按察司是經用刀向周少卿砍訖二刀身死彼有在官夜不收閻添孫潘六十即潘成乘亂跟隨丁廣亦各用刀亂砍閻添孫潘成又用刀故將跟隨周少卿書吏屠成岳寧亂砍

身死俱剥去衣服後衆夜不收因恠在官指揮李杲平素刻剥聲言要殺本官知覺躲在安化王府內彼衆夜不收將伊家財亂行搶訖李杲告鳴寘鐮却將寧夏衛官庫原該李杲收掌賞剩冬衣官布一千五百疋給與伊陪還家財本日未時徐欽等方纔到城常在寘鐮左右侍衛初六日寘鐮要封何錦等官職喚到在官銅匠楊茂鑄造銀關防一顆令在官刊字匠王得洪篆寫討賊大將軍字樣在上令先未故銀匠王時雍別鑿篆文

完備後掛與何錦就封為大將軍又封徐欽為都護十  
一日寘鐸令在官承奉司寫字人管珣已殺孫景文撰  
成省諭文書謄寫刊成板榜比時伊男管律在傍看寫  
二十日寘鐸令徐欽挑選平邊城人馬一百名來用徐  
文孝亦在數內至二十三日來到寧夏城外得知周昂  
等被誅隨即帶領人馬回至姚福堡有今陞仇副總兵  
着落平邊城王指揮差人到堡將原約百戶朱洗等殺  
死徐欽知覺帶同徐文孝各騎馬匹稍帶氊衫布帳逃

躲在洪廣堡北邊沙窩內要出境外投順敵衆至二十  
六日行至地名蘆溝兒忽遇敵衆三騎追趕前來有徐  
文孝乘馬藏躲徐欽被敵衆殺死奪去馬匹衣服後敵  
衆退去徐文孝將徐欽所遺原戴馬尾帽一頂在傍拾  
回又尋獲原棄馬匹氈衫布帳回到韓信營潛住今蒙  
總督張太監差人督同夜不收趙汝舟等訪知經并將  
閻添孫潘成連楊茂王得洪管珣管律并李杲及徐文  
孝陸續擒獲有徐文孝就指引前去蘆溝兒尋見徐欽

身屍朽爛止餘骸骨的係徐欽原屍取其頭骨并氈衫布帳馬尾帽一同送官今蒙審供是實及審閻添孫等八名各供與馮經供同理合照例起解呈乞施行等因到臣會同欽差總督軍務御用監張永議照前事已將先獲犯人申居敬等并何錦等分作三起差委都指揮黃正等先行起解赴京具奏外後獲馮經等未經查審徐欽係首謀重犯已被殺死恐有不的已行鎮巡等官查勘會審去後今據前因叅照犯人馮經在先飲

酒之時雖不知情及至臨期明知丁廣等謀為反逆殺害鎮巡大臣却乃依從指使挾讐同閹添孫潘成將公差少卿周東并書吏屠成岳寧殺死正係兇惡黨類法難輕恕楊茂偽鑄關防王得洪偽篆討賊大將軍字樣事干謀反比之偽造印信情罪尤重管珣依聽謄寫告諭文書刊榜傳播扇惑人心情雖脅從其事亦重指揮李杲雖不與馮經同謀但因夜不收搶伊家財聽從寘鐫指以陪賞為由將官布一千五百疋盜收入已於法

有違除將李杲行鎮巡官取問應得罪名徑自具奏發落其馮經等家屬與前解犯人申居敬等事體相同應否俯從輕典臣等未敢擅擬已行該衙門各捉拿并管律監候外今將馮經等正犯照例差委指揮解鉞等帶領軍人押解赴京與何錦等併問奏請定奪緣係遵奉勅諭起解後獲反逆賊寇事理為此開坐謹題請旨

一為溥恩典以恤邊軍事

題為溥恩典以恤邊軍事查得近該兵部題為存留備

冬官軍事奉聖旨是陝西地方有事備冬官軍着仍舊  
存留聽調但念他每上班日久十分艱苦寧夏各城并  
延綏甘涼各鎮官軍亦皆艱苦可憐各賞官銀二兩在  
城官軍除從逆外有能悔罪効順出城的也各賞銀一  
兩戶部再差官運送太倉銀三十萬兩着各該鎮巡官  
照名給散餘剩銀兩就在陝西官庫收貯以備各邊糧  
餉之用欽此欽遵照得陝西延綏寧夏甘肅四鎮官軍  
委多驍勇慣戰況世受國恩咸願効死盡力但因地方



多事終歲征調無休致令人馬困敝加以該管官員不善撫恤糧賞既不時給又行剝削無厭以此隊無完軍軍無完衣愁苦之狀所不忍言皇上仁同天地特加賞賚以供衣裝之用聞者孰不舉手加額仰戴聖恩但三鎮及寧夏各城官軍俱已沾惠獨寧夏在城之人為因彼時叛逆未平拘於出城之文未得均沾恩典切緣寘鐫何錦謀逆之時寧夏在城官軍除同謀逆黨外近據總兵官署都督僉事楊英查報聞變出城止有官旗軍

舍都指揮等官鄭廉等五十二員名其餘盡被脅從在內但遊擊仇鉞一舉義兵隨即去逆効順相助滅賊可見前日從逆非其本心今惡黨俱已擒斬見在多係無罪之人大變之後憂疑未釋似宜少加矜恤以安其心伏望聖慈一視同仁憫念寧夏鎮城官軍近被反賊逼脅殘害之苦合無每員名照例各賞銀一兩仍於原送官銀內取給則彼萬死一生之餘感戴朝廷再造之恩出於尋常萬萬矣緣係溥恩典以恤邊軍事理未敢擅

便為此具本謹題請旨

一為旌死節以勵人臣事

題為旌死節以勵人臣事准巡撫寧夏地方本院右副都御史馬炳然咨據寧夏等衛申稱正德五年四月初五日寧夏反賊何錦等作亂之日有陝西都司都指揮僉事楊忠正在巡撫都御史安惟學處稟事偶見反賊丁廣等持刀值衝前來要殺安都堂當被楊忠當堂大罵賊狗怎敢犯上謀反等語隨被丁廣等亂砍身死剖

腹剗心又有寧夏衛納級都指揮李睿本日一聞反賊  
氣忿不過前去安化府前意要衝入因是閉門大罵悖  
天逆理反賊如何這等欺公罔上日後凌遲碎割等語  
致被門外夜不收申居敬等亂砍亂剗身無完膚而死  
又有寧夏右衛百戶張欽被何錦等嗔恠本官不肯心  
悅臣順說知革爵寘鐫於四月二十二日要拿來殺害  
本官知覺潛從西城牆溜下走到雷禍堡遇見反賊百  
戶雷英得知前情射死除行寧夏等衛覆勘相同具結

回申前來切照寘鐫何錦等作亂之日舉城之人無不  
被其逼脅朝賀使用而都指揮楊忠李睿獨能挺身罵  
賊不屈以死百戶張欽不肯臣順卒以殞亡此忠義之  
臣氣節凜然孤立若不別加恩典何以激勸人心合無  
具實上聞一體起立牌坊以表其門廬仍量陞官職以  
廕其後裔未敢專擅為此合咨前去煩請照詳施行等  
因到臣照得寧夏大鎮素稱文獻之邦不幸為反賊污  
辱闔城官軍士庶除逆黨外其餘盡被逼脅心雖不從

外則順服禮義廉恥為之蕩然獨都指揮楊忠李睿以  
罵賊而死百戶張欽以逃難而亡使人人皆然何錦等  
數輩安能了然稱亂是其忠憤激烈誠可嘉尚臣聞自  
古聖帝明王於死節之臣必加褒卹所以勵臣節而立  
大閑也伏望聖明憫念楊忠等三人死於逆賊之手乞  
勅該部議奏或表其門廬或別為優恤仍將各應襲兒  
男量陞一級以洩九泉之忠憤以勵天下之臣節其於  
名教不為無補緣係旌死節以勵人臣事理未敢擅便

為此具本謹題請旨

一為十分緊急缺乏糧料馬草事

題為十分緊急缺乏糧料馬草事准巡撫寧夏地方本院右副都御史馬炳然咨會同鎮守太監張弼總兵官署都督僉事楊英查得寧夏在城五倉見在銀糧不勾主兵三箇月支用花馬池見在糧不勾主兵二箇月支用料草全無靈州糧不勾主兵二箇月支用馬草全無中衛糧料不勾主兵三箇月支用廣武營糧料不勾主

兵二箇半月支用興武營糧雖頗有草料全無其餘應該按兵截殺去處數多糧料草束一切缺乏此惟計算主兵支費之數若徵調客兵到彼愈加不足即今賀蘭山後敵衆不時近邊窺伺河套之賊近據延綏報稱俱往西北去訖寧夏正在延綏西北恐其窺知寧夏反變之事意欲乘隙侵掠即目便是八月秋涼倘或山後河套兩路之寇或深入為患或約同夾攻未免調集客兵人馬臨時糧儲缺乏馬匹不敷倉卒之間憑何為計查



得先為緊急聲息預備兵糧等事該職等奏蒙戶部運送銀五萬二千六百八十三兩有零四川運銀一十五萬兩俱累催不曾解到後又亦為前事該戶部又運送銀一十萬與督理糧草都御史徐以貞前來接濟今止運到五萬兩其餘五萬亦尚未到即今米價騰貴每銀一錢止買粟米一斗四五升止買豌豆二斗止買小麥一斗兼以年穀不登客商稀少日貴一日不言可知況布政司原派舊糧俱已停徵新派夏糧俱各運足亦不

勾用查得先年但遇邊儲缺乏許令召商開中雖則易於集事其間作弊多端已蒙停止似難復議但舍此一途不過拘刷富家收買今寧夏富家前該都御史王一言已刷買一次後該都御史安惟學又刷買一次職等目下又要刷買一次拘刷已盡情理難堪將欲差官糴買而防守地方為重顧此失彼將欲一切給軍以銀而或時乏賣銀不可食職等處此大壞極敝之餘百孔千瘡救之不暇晝夜憂惶計無所出萬一失誤地方雖將

職等誅殛無遺亦無益於事矣合無轉奉乞恩再運銀數十萬兩就選委有才智着實幹事都御史一員前來設法措買糧草再差戶部有風力屬官一員前來催償布政司稅糧并未運銀兩庶得專理其事易於集辦有備無患攻守有倚若止靠巡守官與管糧官整理則恐事緒多端不肯久住實幹徒費文移不能濟事為此除具題外合咨煩為照驗施行等因到臣照得寧夏一鎮東西中三路糧料草束委多缺乏而東路逼臨河套乃

敵衆入寇腹裏必由之處糧儲缺乏尤甚且如花馬池  
每年遇冬有警常調延綏遊兵三千在彼按伏興武營  
遇冬常調寧夏奇兵三千在彼按伏今二處料草全無  
花馬池糧亦止勾主兵兩月支用倘或今冬踏冰入套  
擁衆近邊徵調客兵人馬將何支給既無糧草難以駐  
兵敵衆愈無忌憚萬一邊城失守貽患腹裏地方守臣  
何以辭責且寧夏鎮城大變之後人心易於動搖見在  
銀糧亦不勾主兵三箇月支用根本之地如此他尚何

望況山後之敵不時窺伺誠恐兩路受敵尤難支持所以鎮巡官員因見事勢窘迫煩瀆聖聰乞討官銀乞差都御史及戶部屬官前來專理其事情詞懇切蓋亦不得已也但陝西邊儲之乏不獨寧夏為然內而固原靖邊外而延綏甘肅在在空虛見今河西莊浪涼州一帶地方敵騎充斥餉道阻塞公差人員多從西番地面迂路而行近據莊浪叅將魯經呈稱敵衆深入迤西土人居住地方攻尋窖藏糧畜聲言要搶西寧沿邊境外墩

臺俱已丟棄烽火不能接舉臣方經理寧夏事務聞之不勝憂懼意將徵調陝西延綏兩鎮精兵萬餘與本鎮官軍分路夾攻痛加誅勦以祛邊患亦因彼處邊儲空乏難以輕動又漢中流賊嘯聚密邇郡城師老財竭迄無成功首尾受傷中外俱困事勢至此必得大有區畫之才而又假以便宜專制之柄乃克匡濟決非巡守等官所可勝堪臣任總戎務軍馬所至只合責成各該巡撫巡守管糧官員供給但今巡守管糧官既多坐視無

為巡撫官員又復倉皇無措臣若不言日後誤事之罪  
雖死難贖伏願皇上軫念陝西三邊重鎮國家安危所  
係乞勅廷臣會議合無俯從寧夏鎮巡官員所奏再發  
官銀數十萬兩與同近日解送寧夏各邊并軍前合用  
銀兩專備整理邊儲簡命在京部院堂上官一員加以  
重權俾之督理并帶有才力部屬官三員趁今收成時  
月河水未凍之先分投整理延綏寧夏甘肅三鎮邊儲  
陝西沿邊及漢中地方責付巡守官整理布政司管糧

官專一往來催督各府州縣今年夏秋邊糧俱聽差來大臣裁制務待邊儲處處充實方可具奏回京邊儲既充遇有敵警愚臣得以隨宜調遣各路官兵防遏誅勦庶寬宵旰西顧之憂不獨地方軍民之幸而已臣又切思經畫邊儲不過招商派買二端而已招商易於集事姦弊或不能無派買累民暗陪怨讟有所不免茲欲救目前之急不須避招商之嫌於商人增一分之利則公家有一分之益前此招商多被官豪勢要託名報中致



蒙停止但舍此一途而拘刷人戶糴買緣地方時值道里遠近不同計算脚程欲不累人則須高其價省價於官而歛怨於民又非朝廷綏輯邊人之意也臣愚請勅差來大臣不拘招商派糴隨宜區畫俱要嚴加禁革姦弊不許勢要報中其舊報糧草商人納完久未給價雖有詔書明文所司猶稽於奉行蓋不止畏罪避嫌實因官銀無積之故亦須查明處給庶幾近悅遠來商販填委官事可集不然直待事情緊急竊恐招商則無肯應

糴買則無從出不得已而至於它運陝西之民將不堪命況腹裏倉廩空虛無可它者雖有巧智無善處之術矣臣誠愚昧不知忌諱干冒天威無任隕越待罪之至為此具本謹題請旨

一為改調管糧官員事

題為改調管糧官員事照得陝西各府州縣夏秋稅糧馬草分派運送各邊以供軍餉先年設有管糧叅政一員專一督理如叅政王琰安惟學輩不時往來巡歷比

較催徵有司官吏憚其嚴明不敢偷安誤事近該叅議  
管糧夫官無大小苟得其人皆可取辦近該巡撫寧夏  
地方本院右副都御史馬炳然咨稱山後敵衆不時出  
沒套內賊蹤又往西北移營防禦之計不可不慎今花  
馬池興武營料草升束皆無各邊倉分見在銀糧不勾  
主兵二三箇月支用未聞管糧等官親歷何處倉塲設  
一謀一策為一人一馬之費叅議許莊雖不知能幹與  
否未見著意邊儲依時巡歷地方似此官員若雖留幹

事終難克濟合無另推舉着實幹事官員前來管糧替  
回本官量才別用庶能共濟邊事等因備咨到職查得  
陝西各鎮糧儲缺乏不止寧夏為然布政司管糧官例  
該督催八府糧儲以供各邊之用不止寧夏一鎮是其  
責任況今西有強敵之侵南有流賊之警督理邊儲政  
務之大莫急於此非得才力有為實心幹事之人安可  
倚賴叅議許莊篤實有餘風力不足用之腹裏或有可  
取邊方軍餉非其所長直待失誤事機罪之無益臣博

訪得陝西苑馬寺少卿陳璘陝西西安府知府陳祥俱  
勤勵幹固素著風采使當前項責任必有可觀伏願皇  
上憫念邊方多事之秋軍儲為第一重務乞勅吏部訪  
察議擬將叅議許莊改調別省仍於陳璘陳祥內上請  
簡命一員暫陞叅政職銜令其盡心往來催督八府錢  
糧整理三邊糧草如果蹟効顯著待後邊情寧息之日  
具奏陞用仍照近例止選叅議一員管理臣以地方安  
危所係利害切身不避煩瀆聖聽無任悚懼激切之至

緣係改調推用管糧官員事理未敢擅便為此具本謹  
題請旨

一為缺官催辦錢糧刑名等事

題為缺官催辦錢糧刑名等事准巡撫寧夏地方本院  
右副都御史馬炳然咨會同鎮守太監張弼總兵官署  
都督僉事楊英查得寧夏一鎮有王府宗室有七衛三  
所六驛遞八十餘處營堡倉場事頗繁難糧草支費亦  
不為少近遭大變之後人心殆不如前禮義稍疎於昔

各衙門卷簿盡被反賊燒毀。緣作弊爭訟倍多。況賀蘭山後敵衆不時出沒。河套之賊又移營向寧夏方位防禦之計。至為緊急。今通查花馬池興武營及寧夏在城等緊要去處倉場。見有銀糧不勾二三月主兵支用料草。甚至升束皆無。此項軍儲例該都布按三司分巡分守管糧管屯官整理。缺乏失誤。罪有攸歸。今未聞各官親歷何處倉場設一謀一策。為一人一馬之費萬一失誤。軍機豈不一槩負累。若再靠前項官員幹事。誠恐

因襲故弊難以成功查得先年曾設按察司僉事一員  
常在寧夏居住管理錢糧刑名後奉事例裁革以後大  
小事務俱職等整理雖則大事不敢疎畧至於小事亦  
有不周竊思職等邊方鎮巡官之責重在軍馬城池防  
奸禦侮與夫錢糧刑名等事之大經大法提綱挈領張  
主于上耳至於條分縷析上流下接職在三司今必得  
按察司官一員分理庶事則上下相維共成公務伏望  
轉奏合無暫設按察司僉事一員常在寧夏居住聽職



等提調收放糧草問理刑名往來本鎮巡歷禁革各項  
奸弊不許腹裏鎮巡按衙門擅便差委但事干邊務  
比之腹裏事情不同若照常例推舉一則恐其到任稽  
遲一則恐其不知邊事宜從於陝西附近見任官內有  
才幹風力者訪得實疏名奏請擢用齎憑到任管事庶  
濟目前之急便益等因備咨到臣照得寧夏大鎮錢糧  
刑名事務繁多雖有分巡分守官員常在腹裏相離邊  
方寫遠顧藉不周所以先年專設按察司官一員常在

寧夏居住管理各項事務專聽寧夏鎮巡官員提調後奉例裁革大小事務俱是鎮巡自行整理顧此失彼未免委托衛所官員代理以致弊奸橫生官軍受害今地方所遭大變錢糧缺乏詞訟繁興山後套中之敵兩該防禦鎮巡責任重大豈能親身庶務巡守管糧等官又皆畏難不來所以太監張弼都御史馬炳然都督僉事楊英議要照舊添設按察司官一員分理庶事一節不為無見節據寧夏等衛所官軍旗士赴臣訴告亦要添

設按察司官以清錢糧奸弊所見皆同但事干邊務比與腹裏事情不同若照常例推舉恐其到任稽遲及不知邊事如見任分巡管糧等官雖有如無何濟於事博訪得陝西鞏昌府同知張檄慶陽府同知李賓俱通敏有為且久任邊方諳練事體相應擢用伏望聖明軫念邊事之難俯納守臣之見乞勅吏部查議合無暫設按察司官一員專在寧夏居住聽鎮巡官提調監放糧草問理刑名往來巡歷三路地方禁革各項奸弊不許腹

裏撫按衙門輒便差委仍將臣所推張檄等二員再加訪察如果相應疏名上請擢用齎憑到任管事以濟目前邊務之急待後邊情稍寧事體已定另為議奏裁革緣係缺官催辦錢糧刑名及推用官員事理未敢擅便為此謹題請旨

一為調兵征勦犯邊敵衆事

題為調兵征勦犯邊敵衆事案查先據分守莊浪等處右叅將都指揮同知魯經呈為敵衆犯邊阻絕墩臺缺

軍守瞭事照得莊浪地方自舊歲十月到今敵衆犯邊  
侵擾會兵勦殺今驕不退連日糾衆深入過路往西徑  
奔土人居住黑臺西大同三岔等堡攻尋窖藏糧蓄聲  
言要割田禾去搶西寧地方節統官軍設伏歸路陸續  
擒斬首級及差人爪探臨境安帳晝瞭夜伏已行開報  
甘肅衙門外查得境外該接烽火礮灘等墩二十七座  
俱各丟棄無人止守順路墩臺欲便照前撥人守哨緣  
敵衆見在土豹嶺以裏分水嶺以外適中北自平嶺野

遜嶺起至迤南四眼井台麻水等處敵帳數多約敵萬餘遠近不等撒畜牧放相離到城一百二十餘里月無虛日出沒往來尋搶絕道不通缺軍往彼瞭望況本城人馬不滿三千實是兵寡力弱不敷支敵乞念地方為重早為處置增添兵馬前來併力勦逐便益呈乞照詳等因到臣看係緊急軍情已經備行甘肅鎮巡及副叅遊擊等官整棚人馬用心隄備遇有侵犯小則相機戰守截遏大則傳報鄰境官軍互相應援不可自分彼

此失誤事機去後續據叅將魯經呈為敵衆犯邊事正  
德五年七月初三日至初八日時不等節據東山墩舉  
放砲火隨據迤南破山口等處夜不收張山住等迤北  
打柴溝夜不收尹奉等各報敵衆壕邊瞭望行走備報  
看得敵衆不次前來探道與同甘肅遊擊將軍吳英計  
議恐入為擾當日分布在城并遊兵人馬於南北二路  
站堡屯莊設伏遇警聯絡互相策應各職整兵外十二  
日午時據古城兒夜不收馬欽飛報前來有一千餘騎穿

戴明盔明甲執打藍白旗號從東山突出過壕奔路順  
河行來近城當會遊擊吳英各率兵馬出城間及據沙  
溝鋪夜不收王三走報已時分瞭見敵衆一百餘騎遇  
見迎接甘州公差使客千戶孫鑑人馬攻圍備報職等  
各統見在馬步官軍合陣擺列前到沙溝鋪兒迎見敵  
衆分作三路納喊衝來職身先士卒就與交鋒不意將  
本職左腿射訖二箭馬匹射死有遊擊吳英頭盔射訖  
一箭不次衝攻數分數合又瞭見墩口有一塊劄營自



午戰至申時職等申嚴號令各督官軍把總指揮陳鎧等敢勇當先衝入陣中鏖戰陳鎧被射數箭未傷皮肉遊兵把總指揮趙珍馬匹射死內千戶魯儀吳倫等奮不顧命就陣斬首六顆奪獲戰馬軍器欲再前追又值天晚收兵回城敵衆當夜仍往原路出境十四日據夜不收陳貴探得敵衆離城不遠在於教場山後放馬登由塔兒山行走據此查得陣亡旗軍充伯赤等二名被箭射傷官軍二十五員名射死馬二十一匹走死馬一

十三匹及據莊浪等衛千戶孫鑑等呈稱蒙領有馬官軍一百員名於本月十二日前去岔口迎接甘州公差使客行至杜家沙溝口忽遇潛伏敵衆二百餘騎穿戴明盔衣甲撲向大路交鋒被衆攻圍對敵射死軍人徐友亮甘州都司承差閻宗魁將馬夫葉泰捉拿本役將原背包本丟棄被搶行李站馬一匹騾一頭戰間有武勝堡按伏遊兵馬步官軍指揮包英等即時帶領馬步官軍三百策應其衆復回原路去訖查得被箭射傷軍

人朱遷等五名射死馬八匹開呈到此照得敵衆久住在邊不時出沒或遣輕騎而東西剽掠或佯乏馬而誘我官軍顯是糾衆部落恃倚人馬衆大深入況其情變詐難測除整兵隄備及將斬獲首級奪獲敵馬器械劄發莊浪衛收養聽候解驗外呈乞照驗施行隨據甘肅遊擊將軍都指揮僉事吳英亦呈相同行間又據守備蘭州地方署都指揮僉事閻縉呈為敵衆出沒事內稱本年七月初一日敵衆一運從鹽場溝入境按伏指揮

魏時領軍追趕對敵射傷軍人劉來全及將猴子山墩  
攻圍射傷墩軍張彥方張成陳九一等三名又至地名  
滾巴川等處將常哨夜不收馮六兒殺死蔣貴八無有  
下落等因各呈到臣為照河西地方莊浪紅城子起直  
抵鎮番永昌等處俱有敵衆住牧帳窩聯絡離邊不遠  
不時突入搶掠為患而莊浪涼州尤甚道路阻塞砲火  
傳報月無虛日先因境外該接烽火墩臺年久丟棄不  
守以致此番肆無忌憚即今深入迤西搶攘聲言要搶

西寧地方雖據曾經吳英各呈報暫獲首級數亦不多  
似無懲戒又將公差人役捉殺中間或有別項隱情除  
查勘外近又侵犯蘭州境界攻圍墩臺殺死應哨人役  
黠桀性成未可窺測觀其事勢必須廣徵士馬痛加誅  
勦庶幾後患可弭地方可寧但臣撫制以來一向經理  
寧夏事務未據甘肅鎮巡官員一字呈報彼中軍馬多  
寡糧草虛實及賊營離邊遠近俱難遙度止是莊浪守  
將節呈前因欲便調集大兵前去策應行據各倉場查

得莊浪糧料草束俱已支銷盡絕紅城子倉止有糧七千餘石料草俱無軍馬到彼將何支給已經選委蘭州衛指揮陳松管領蘭州靖邊二處挑選精健有馬官軍八百員名前去莊浪駐劄暫聽叅將魯經調度遇有賊寇侵犯併力追勦截殺及不次移文甘肅鎮巡督同副叅遊擊等官從長計議酌量本鎮兵馬多寡強弱如是力能捍禦保得不致失誤大事宜從照舊戰守互相應援截遏不可養患殃民倘或賊勢重大兵力不敷相應

大舉誅勦就便計議進兵方畧應調主兵馬若干仍計  
算見在糧料草束可勾主客兵馬若干支用會處停當  
作急行來以憑調兵約期行事其糧儲缺乏之處查支  
官銀上緊設法糴買措置毋待臨期失措責有所歸去  
後至今亦未回報竊料此寇先被小王子人馬讐殺殘  
敗去年潛伏河套又被我沿邊官軍尋襲斬獲數多今  
冬或恐不敢入套但河西地方尋搶月久野無所掠冰  
橋結凍之後恐有窺伺蘭州靖邊之謀彼處軍馬數少

通敵隘口頗多萬一乘虛而入則會寧安定狄道金縣  
地方難保不遭搶掠見今漢中流敵劫聚未息調去洮  
岷西鳳環慶等衛馬步官軍召募民壯番兵五千六百  
員名續又調西安四衛備冬下班管項官軍三千員名  
難便掣回沿邊兵備比常單弱又恐冬間踏冰過河  
套無所不備則無所不寡首尾受敵誠難支持宜趁今  
河水未凍套內無警將前敵驅逐遠遯以祛河西患害  
以免隴西內顧之憂庶幾遇冬可以專意防禦保守欲



待甘肅鎮巡會議回文至日方纔具奏緣道途阻滯不知何日方得行來不無延誤訪得莊浪外境蘇海圖北至明水湖一百五十里處處俱有敵營東至靖邊達喇蘓亦一百五十里可通人馬合無徵調延綏副總兵王勛統領奇兵遊擊將軍時源統領遊兵二枝共六千員名寧夏各項兵馬內挑選令西路叅將馮禎統領共二千員名并陝西遊兵挑選二千及固原環慶靖邊蘭州等處官兵內各挑選亦共二千員名通共客兵官軍一

萬二千分作三路一路從靖邊達喇蘓渡河一路蘭州  
渡河從定火城而進一路從紅城子莊浪官道而行會  
合叅將魯經遊擊吳英涼州分守副總兵徐謙涼州按  
伏甘州副總兵白琮官軍人馬刻期分投出境追逐與  
境外之兵俱至蘓海圖土豹嶺斬石硤蘆塘湖一帶隨  
敵所向尋襲追殺直抵明水湖地方敵腹背受敵必然  
潰敗不支莊浪涼州之敵既以驚潰則鎮番永昌甘肅  
之敵不戰而自走矣振中國之威奪外夷之氣莫要於

此然事干各鎮必得大將一員統領約束乃克有濟推  
訪得鎮西將軍總兵官都督曹雄各鎮將官素所推服  
伏望聖明俯垂省覽乞勅兵部叅詳議擬如果可采早  
為覆奏上請行令臣照依前擬調集官兵請勅都督曹  
雄提督各路將軍軍馬甘肅鎮巡官統領鎮兵專備永  
昌以西地方用防敵衆西走衝突之患臣統領中軍官  
兵於莊浪居中駐劄調度策應必期成功以副委任敵  
既遠遯一面具奏一面班師以備河套行令該鎮將沿

邊舊守墩臺查照修築撥軍瞭守傳接烽火及將邊外舊設蘓海圖巴勒章等城堡以漸經營修復屯住軍馬方可經久無患但各處糧料草束十分缺乏除蘭州靖邊等處已行巡守兵備等官查支官銀糴買備用但恐不敷其莊浪涼州地方雖節行甘肅巡撫查處猶恐緩不及事仍乞俯從臣近日擬奏簡命大臣前來督處邊務職任專一易收成效及行各該巡撫管糧等官趁時作急整理勿再因循推調以誤大計食足則兵強速人不

患於不服地方不患其不寧矣臣聞自古帝王之於遠人來則薄伐去則不追擣虛窮追誠非至計但今失穴之敵竊伏我邊東突西馳彼入此出迎之則不至去之則復來昔人所謂窮邊易以計破難用兵碎者也若玩時愒日兵力兩匱未免坐困中國沉官路久被阻截貢餉不通河西重鎮似為外境貽四夷之侮關係匪輕臣不勝惓惓體國之至敢用昧死上言貪功喜事非臣本志天日所鑒臣不敢欺但兵貴神速事難預料旬月之

間機會或異若命下之後糧草未備或敵勢稍退及套內別有緊急敵情另為具奏待有機可乘不拘何月日即照題奉成命行事庶免臨期論奏以為後時之舉緣係調兵征勦犯邊敵衆事理未敢擅便為此具本謹題請旨

一為謝恩事

奏為謝恩事節該欽奉勅得爾奏行至陝西地方差官出榜撫諭寧夏軍民人等及會同總督軍務太監張永

案行寧夏鎮巡等官將反賊寘鐫何錦等并的親家屬  
及續獲反賊查審造意根因首謀共謀脅從等第及各  
官原報功次事情同異各起解釋放又追收冊印冠服  
儀仗等物籍沒家產財物入官仍將同謀夜不收擒獲  
各項事情俱有次第具見爾奉命在邊運謀効力勤勞  
可嘉茲特降勅獎勵爾其益殫心力以卹軍民以安疆  
場庶不負委任之重爾其欽承之故勅欽此欽遵望闕  
叩頭謝恩外伏念臣本庸愚先年叨承任使患病不能

供職後蒙聖恩放回致仕幸得生全邇者復蒙起用適  
因寧夏有事勅使臨門不敢辭避星夜兼程前進行至  
陝西地方聞知叛逆已平但人心憂疑未釋節差千戶  
王臣百戶韋臣齋領告示榜文前去撫諭臣仍兼程到  
於寧夏會同欽差總督軍務御用監太監張永處置各  
項事情此皆人臣職分之常別無功能可錄豈意天地  
之量不棄微勞降勅獎勵臣內自循省增愧增懼但蒲  
柳之質易衰犬馬之年漸老感恩徒切欲報未能一寸



之誠不敢自負臣不勝瞻仰感戴之至緣係謝恩事理  
為此具本謹具奏聞

一為衰病不能供職乞恩放回休致事

奏為衰病不能供職乞恩放回休致事臣先任前職總  
制陝西邊務正德元年十二月內因在邊感冒風寒致  
將舊患目疾痰疾舉發不能任事陳乞休致蒙准馳驛  
回還養病後因公事連累提解赴京復蒙聖慈寬貸容  
令致仕臣感恩如天圖報無地方與田夫野老沐浴清

化歌詠太平正德五年五月初二日該吏部公文開稱  
臣蒙起用本月初四日該錦衣衛舍人王諫齎捧勅書  
為因寧夏反逆事情命臣仍總制陝西延綏寧夏甘涼  
各路軍務臣時卧病在於直隸鎮江府丹徒縣居住聞  
此大變自念主憂臣辱非臣下辭避之時扶病強起星  
夜兼程到於陝西地方又欽奉勅旨提督經營及陝西  
各路人馬勦殺賊寇時寧夏反逆已平復奉勅會同太  
監張永前往彼處撫安軍民處置各項事情除將應行

事宜會本條陳次第具奏外緣臣章句庸才柳蒲弱質  
中年多病齒髮漸落今耳鳴如蟬目眩生花數步之間  
不能辨物又兼腰膝無力行坐跪拜十分艱辛稍加勞  
苦輒欲歌仆雖受恩隆厚不忍自棄而筋力衰憊不能  
自強況陝西三邊責任重大軍旅之事實非所長若猶  
貪戀榮祿忌避不言終恐債事貽患雖死莫贖臣是以  
不避斧鉞冒昧自陳伏望皇上天地之量憐臣衰病放  
回照舊致仕臣得保全骸骨生還鄉里不勝感戴天恩

之至緣係衰病乞恩休致事理為此具本謹具奏聞伏  
候勅旨

一為易置守備官員事

題為易置守備官員事案查先據守備洮州地方署都  
指揮僉事高謙呈為土豪不悛造意聚眾截路白晝搶  
劫財物執刀打傷人口謀陷地方欺凌異鄉官員等事  
內稱被洮州衛指揮張綸倚恃土豪聚眾家人毀罵趕  
打搶奪衣服器皿要乞調守別項地方另推官員前來

代守等情已經批行分巡隴右道陝西按察司僉事張  
瀾會同布政司分守官提人勘問備招叅呈定奪未報  
訪得守備都指揮高謙委被指揮張綸挾制欺凌毀罵  
趕打不止一次緣洮州衛僻在萬山之中極臨邊境番  
漢雜處最難控馭高謙奉勅守備乃被一屬官凌侮出  
入之間動輒受制行事之際不得自由體統乖違下人  
玩慢若不早為易置倘或番人侵境不能統兵出禦貽  
患非輕但彼處土豪官舍軍民交結番人生事害人者

不止張綸一人若止照常例將京營及別鎮官員推補  
恐其不知番情又為奸豪之人所制博訪得臨州衛納  
粟都指揮僉事趙濟世出將門人心素附讀書守己俱  
有可觀岷州衛指揮使葉勲練達戎務諳曉番情久掌  
衛印行事無失乞勅兵部再行訪察上請合無將高謙  
取回京營或改任別處守備於趙濟葉勲二人中推用  
一員守備洮州地方仍行巡按陝西監察御史將張綸  
一千人證提拿勘問明正國法庶使人知警懼不敢效

尤後來官員可以行事緣係易置邊方守備官員事理未敢擅便為此謹題請旨

一為處置邊儲事

題為處置邊儲事據陝西布政司呈蒙臣批據山西陝西等處商人李朝用等狀告前事仰布政司查去年總制衙門曾否奏開所告殘鹽有無明文行到及查勘合已填若干未填若干今告要將原報未納完糧草准令上納完足填給勘合一節有無相應計處停當呈報定

奪蒙此案查正德四年七月初六日抄蒙總制尚書才鈞帖據固原并山西平陽等府衛商人黃河等狀告為告查勘合事仰本司查商人黃河等報中鹽引有無停止未收之數曾否准令上納出給實收繳報即今有無勘合填給或否支給銀兩明白呈來施行蒙此案查先為處置邊儲預防邊患事成化二十一年二月初七日承准戶部陝字一千六十五號勘合該侍郎李衍題為預備邊患事開中兩淮運司山東運司四川鹽課提



舉司成化八年至十九年常股存積鹽共二百萬引撥  
榆林等處招商中納降到勘合二百道本司收填節承  
准巡撫延綏呂都御史照會收完商人田斌等共報納  
鹽七十八萬四千二百一十四引實收到司填給勘合  
七十九道發領訖未中鹽一百二十一萬五千七百八  
十六引未填勘合一百二十一道正德元年九月內本  
司見得本處地方自弘治十四年敵衆大舉入攻之後  
動調軍馬費用糧草數多以致歲入不勾歲用要將前

報剩殘鹽另定價值量為減輕行令本司招商報中收銀完日分撥臨邊延慶等府糴買糧料草束以備邊方支用具呈巡撫陝西右副都御史張泰定奪奏請未示續蒙巡撫右副都御史柴昇批蒙商人李朝用黃河等告稱先年開中淮鹽各商告撥固原新安等倉上納米豆穀草遇例停止將納過糧草出給實收未納之數見今在堡堆放要行中納前項殘鹽填給勘合等因到司為照未蒙明文難擅准行但各該倉場俱係軍馬駐劄

要害之地李朝用等既稱買有糧草在彼堆放合無行  
移陝西按察司分巡關西道僉事李璣查照彼中糧草  
價值先行定擬的確價值省令各商明白供認在官行  
令該倉收受明立卷簿仍將收過糧草數目扣算明白  
造冊備照每商給與小票執照待至正德三年二月終  
如前鹽准令中納照依引鹽價值行仰該倉扣出實收  
齎繳本司給與勘合前去該司支鹽若是不准招中查  
支官錢給還各商備由具呈定奪蒙批仰依擬施行已

經移文僉事李璣查照施行一向未准回報本司將查過緣由并各年勘合引鹽開呈照詳去後正德四年閏九月內准固原兵備副使王凱牒呈為告查勘合事奉總制尚書才劄付定擬商人黃河等截中兩淮運司成化十五年分中剩常股鹽一十三萬二千七百五十引每一千引上納粟米四百石或豌豆六百石或穀草一萬束仰司轉行固原等倉查黃河等原報引鹽糧料草束如果俱已納完是實扣算明白出給實收付各商

齋赴布政司填給勘合前去運司支鹽亦不見開有題  
准字樣案候間節據商人楊得山等齋執納獲固原等  
倉原在總制衙門告報兩淮運司成化十五年鹽引糧  
草實收前來共該鹽一十二萬二千八百八十八引填  
給秦字二號起至十四號勘合一十三道付各商領齋  
訖今蒙前因今各邊糧草在在苦無多積各該鎮巡等  
官不時告乏奏請戶部多方區處惟恐不及況此先年  
原剩鹽引若招商中納不猶愈於他項區處今將前項

緣由并各年引鹽勘合開坐呈乞照詳定奪施行等因  
據此簿查先據商人李朝用等告前事已經批行本司  
查報去後今據前因臣於接管卷內查得先為告查勘  
合事正德四年八月內該總制尚書才奏稱固靖環  
慶延綏寧夏各路倉場見在糧料草束不多要將前項  
中剩兩淮山東二運司殘鹽仍照原擬招商上納糧草  
但恐各該運司前項引鹽近來差官查賣盡絕乞勅戶  
部照卷清查如果見在別無支賣內除商人黃河等該

支二十三萬二千七百五十引之外其餘九十八萬三千三十六引乞准招商分撥糧草不多倉場上納以備支用等因在卷一向未奉欽依明文臣查得成化二十一年間原開兩淮山東二運司并四川鹽課提舉司成化八年至十九年官鹽二百萬引降到勘合二百道彼時招納商人田斌等兩淮并四川提舉司鹽七十八萬四千二百一十四引填過勘合七十九道近該總制尚書才奏稱已招商人黃河等該支鹽二十三萬二千

七百五十引止是商人楊得山等納過糧料草束該支  
鹽一十二萬一千八百八十八引已填勘合一十三道  
前去兩淮運司支鹽訖其餘仍奉例停止通計前後二  
次中過鹽九十萬七千一百二引已填勘合九十二道  
未中殘鹽一百九萬二千八百九十八引見存勘合一  
百八道內除山東運司二十四萬九千四百六十八引  
無人報中實有兩淮運司中剩成化十五十六十七十  
八等年分常股鹽八十四萬三千四百三十引俱係見



存勘合未填之數竊惟邊方儲蓄以預為先以多為貴  
陝西延綏寧夏甘肅四鎮邊堡倉場糧料草束查得委  
多缺乏見今漢中之流賊未殄河西之敵患未除賀蘭  
山後敵衆不時窺伺近據走回人口說稱敵衆起營往  
東北去訖冬寒在邇恐其乘凍踏冰入套寧夏邊牆如  
是不能阻遏則陝西腹裏根本之地誠有可憂臣於今  
年七月內已將十分緊急缺乏糧草緣由具奏未奉明  
文近又行據各該兵備巡守等官副使黃繡等查勘固

原環慶靖邊蘭州一帶倉場或有糧無料無草或有料  
無草無糧或有草無糧無料或糧料草束俱無本處主  
兵支用尚且不敷倘若動調客兵將何支給興言及此  
可為寒心陝西巡撫遠在漢中勢難內顧臣有地方之  
責豈敢坐視雖經節行布政司管糧分守等官督徵起  
運邊糧但各年拖欠糧草遇例停免止有該年夏秋稅  
糧數亦不多況地方人民彫敝催徵急難完納欲發官  
銀招商易買緣各該司府州縣庫藏官銀多無積蓄又

因先年招中糧草商人節奉事例或將已給銀兩追併減除或將已納糧草不行給價以致虧折資本怨聲載途即今雖欲招之莫肯應命惟有前項殘鹽衆心樂趨告報者多中間亦有總制尚書才明文招報運送糧草到倉停止不得收受情詞激切尤為可憫臣節經行令該司查理明白欲候奏請明文至日方准報中但正在緊急缺乏之際若不趁今收成時月先令收買上納向後河凍報有聲息道路阻隔不能運送有誤供億已

經照依前巡撫都御史柴昇批行事理行令兵備巡守等官將告報糧料草束商人逐一拘審分撥固原靖邊環慶蘭州及寧夏花馬池興武營等處缺乏倉場立限上納仍斟酌地方遠近險易年歲收成厚薄定與值價如蘭州等處照依尚書才原擬每一千引上納粟米四百石或豌豆六百石或穀草一萬束固原靖邊環慶等處地方稍近收成頗可各量為增添花馬池興武營等處地方險遠腳價高貴量減其數責令各供認在官

各行該倉照數收受明立卷簿收完扣算明白備造方冊開送布政司及兵備等衙門各收存備照各商給與該倉印信小票一紙令其執照待有明文至日如前鹽准令中納照依引鹽價值行仰該倉扣出實收齎繳該司給與勘合前去支鹽若是不准招中就於官庫或於該倉查支官錢給還商價各通行去後今將查處過緣由備陳始末上瀆天聽伏望聖明俯念邊事孔艱邊儲關係至重乞勅戶部查議如是別無違碍具由上請合

無將前項中剩兩淮運司成化十五十六十七十八等  
年常股殘鹽八十四萬三千四百三十引准令招中行  
仰陝西布政司轉行各兵備巡守等官查原報糧料草  
束商人如果上納完足行令該倉出給實收齎繳該司  
填給勘合前去運司支鹽不盡之數仍招商派撥延綏  
寧夏各缺乏倉場上納以濟目前邊儲之急以慰三邊  
軍民之望如事有窒碍難以招中亦乞降發官銀照依  
原擬糧料草束斗頭斤數時值給還各商庶不再虧公

家之信重失商人之心將來邊方儲蓄猶有倚賴緣係查處邊儲事理未敢擅便為此具本謹題請旨

一為交收符驗關防事

題為交收符驗關防事據陝西都司署都指揮同知鄭廉呈抄蒙鎮守寧夏地方都知監太監張弼案驗會同總兵官楊英副總兵仇鉞議將開送符驗關防卷簿及跟隨書辦吏典於正德五年九月十一日眼同照依粘單內逐一暫且封收約束在官待新任巡撫到彼徑自

一同交送緣由回報到臣案查先准吏兵二部并本院咨為缺官事照得巡撫寧夏地方本院右副都御史馬炳然近節奉欽依着他守制去吏部便推堪任巡撫的兩員來看欽此欽遵該吏部會同兵部議得寧夏地方新遭變故雖旋即事定而賀蘭山後尚多敵營撫禦正須得人右都御史楊一清見在彼處總督軍務合無行令暫在彼處居住從宜加意撫恤其三邊軍機係干征調重事仍聽節制待邊敵流賊寧靖之後另行具奏定



奪等因題奉聖旨是欽此欽遵備咨轉行前來除欽遵  
於本年九月初一日前到寧夏駐劄行事外續准右副  
都御史馬炳然咨送達字二百八十九號符驗一道巡  
撫寧夏關防一顆臣暫且封收及將未完卷簿接管施  
行間本年九月初八日續准吏部咨本年八月十六日  
該司禮監太監溫祥傳奉聖旨總制都御史楊一清南  
京太子少保吏部尚書梁儲致仕工部尚書李鏊各寫  
勅着馳驛來京吏部知道欽此欽遵備咨前來除將原

封收達字二百八十九號符驗一道巡撫寧夏關防一顆劄仰都指揮鄭廉轉送鎮守寧夏地方太監張弼暫且收貯待新任巡撫至日徑自交送去後今據前因除欽遵候勅旨至日馳驛赴京外緣係交收符驗關防事理為此具本謹具題知

一為謝恩事

奏為謝恩事據陝西布政司呈正德五年九月初九日抄蒙鎮守陝西等處地方司設監太監王興案驗為傳

奉事奉司禮監印信揭帖本年八月十六日本監太監  
魏彬等於乾清宮欽奉聖旨賞差往寧夏等處勦殺賊  
寇回還提督軍務都察院右都御史一員楊一清銀五  
十兩紵絲四表裏內大紅織金胸背獅豸一表裏羊一  
隻酒十瓶該衙門知道欽此欽遵本監將奉到旨意事  
理備云前去陝西鎮巡并三司等官太監王興等欽遵  
給散施行等因轉呈到臣除將欽賜銀兩表裏羊酒等  
物望闕叩頭領受外伏念臣曩因謝病休致家居近者

蒙恩起用奉勅征勦寧夏賊寇兼程前來彼時邊將宣  
力元惡授首其後擒獲逆黨撫安地方皆總督太監張  
永之功臣不過隨同行事據實奏報而已曾無尺寸之  
勞顧荷駢蕃之賜榮非意及感與懼并金幣輝煌侈書  
生之服用牲醪醉飽頒餘惠於官兵茲蓋皇上天地涵  
育造化生成欲示勸於衆人不吝賞於片善踰涯之恩  
無補過分之寵奚堪矢竭螻蟻之微忱用答乾坤之大  
德臣不勝瞻仰感戴激切屏營之至緣係謝恩事理為

此具本謹具奏聞

一為推訪將材以備任用事

題為推訪將材以備任用事臣自先年督理馬政巡撫總制俱在陝西地方近又蒙恩起用仍總制陝西各路邊務竊念禦戎為今日所急選將為戎政所先故於陝西延綏寧夏甘涼四鎮大小軍武官員頗嘗留心推訪即其行事兼察其用心驗其器識兼考其材藝雖人材難得未免得此而失彼然使人以器自當舍短而求長

況當朝廷一新政令之秋正臣下以人事君之日苟有所知安敢隱默除見任主副將官及曾經臣論薦者不開外竊見分守寧夏西路地方左叅將都指揮僉事馮禎器識雄偉號令嚴肅陝西都司掌印新任四川叅將署都指揮僉事楊宏文武具備材節兼優是二人者皆可備西北大將之選馮禎久滯邊裨似不盡其用楊宏近擢川將似用違其材甘肅遊擊將軍都指揮僉事吳英延綏遊擊將軍都指揮僉事時源俱有摧鋒陷堅之

勇三邊戰將號為出色延綏各堡把總都指揮僉事閻  
勲高時彭械鄭驃指揮使安國寧夏都指揮同知陳珣  
鄭廉陝西先任遊擊將軍今緣事復職署都指揮僉事  
張鎬守備岷州署都指揮僉事趙文西安後衛指揮使  
施傑西安前衛指揮同知蔣存禮是數人者俱各閑於  
弓馬熟於戎陣事體頗皆疏通行檢亦無所失用之陝  
西各鎮大可以備偏裨之選小可以克守備之任或戰  
或守俱無不宜其餘堪任將領者固多臣未深知不敢

濫舉如蒙乞勅該部再行訪察遇有相應員缺將各官量材擢用其於陝西三邊軍務必有益緣係推訪將材以備任用事理未敢擅便為此具本謹題請旨

一為薦舉賢能官員事

題為薦舉賢能官員事臣竊見陝西布政司左布政使燕忠心知嚮正官有執守為御史風采素聞司馬政勤能匪懈比遷藩臬正官益自操持不怠當權奸劉瑾氣燄薰灼之時獨無附麗干謁臣比緣查處邊儲本官盡



心區畫事有條理委係賢勞相應薦舉其餘布按二司  
官員雖有才能臣職在軍旅未經委用試驗不敢泛陳  
乞勅吏部再為詢訪如果臣言不謬待有相應員缺將  
燕忠早擢任用庶使方面臣僚有所激勸興起緣係薦  
舉賢能官員事理未敢擅便為此具本謹題請旨

一為陳情乞恩辭免欽取陞任容令休致事

奏為陳情乞恩辭免欽取陞任容令休致事正德五年  
九月十九日該固原衛指揮符深齋捧節該欽奉勅先

因西邊有事特起爾總制軍務令地方已寧勅至爾即  
馳驛來京毋得稽遲故勅欽此欽遵於本月二十二日  
起程外本月二十八日准吏部咨為缺官事該本部等  
衙門題照例會推得臣等堪任戶部尚書等因具題節  
該奉聖旨楊一清陞戶部尚書欽此欽遵備咨到臣綸  
音渙召既承馳驛之榮金部需才復玷尚書之選便蕃  
有命局躋無容臣稟賦素薄血氣早衰往年因病休官  
幾莫逃於法網此者聞變強起幸適會夫成功自到寧

夏以來苦於馳驅疲於案牘目疾屢作痰氣時攻已於  
本年九月初一日備將衰病不能供職緣由具本陳情  
乞歸休致方屏營而候命忽徵拜以蒙恩益深覆餗之  
憂重切臨淵之懼伏念君命所召不敢稽違兼程前進  
行至河南懷慶衛輝等處地方加以風熱之侵舊疾轉  
甚心神怔忡頭目暈眩胸腹脹悶臟腑滑泄沿途服藥  
未見痊可自揣孱病之軀終非朝坐之器竊思戶部掌  
人民財賦政務浩繁國家元氣所係必得疏通精練之

才乃能負荷宜臣迂腐衰憊之人所克勝戡雖欲効陳  
力就列之忠恐難逃曠職素餐之誚況當朝廷一新政  
令之時正臣下奮庸熙事之日四海之內孰不延頸跂  
足以望太平臣非草木安忍自棄顧省躬度分以筋力  
則不勝以才能則不稱夙夜兢惕不知所處且今賢俊  
林立隨取隨足不患乏材而司徒重秩猥及不肖臣猶  
自駭人將謂何恐傷知人之明以為新政之累此臣所  
以赧顏疚心而不能自安者也伏望聖慈收回成命俯

從前懇容臣以舊官放回休致使得調養病軀偃伏林下以全餘年則仰戴天地生成之德又出於尋常萬萬矣臣瞻望闕廷不勝激切除扶病在途恭俟允命外緣係陳情辭免恩命放回休致事理為此具本謹具奏聞伏候勅旨

一為患病事

奏為患病事臣比在寧夏總制邊務奉勅行取馳驛來京行至中途舊患痰疾舉發時作眩暈後又感冒風寒

咳嗽喘逆心腹不寧節經具本陳情放回休致未蒙俞  
允臣感恩益切不敢稽留扶病前來本月初四日到於  
京城宣武門外欲便進城報名朝見緣前患欬眩暈  
等疾俱未痊可誠恐趨走跪拜之間致有失儀不便臣  
是以昧死上陳伏望聖恩容臣暫在門外延醫用藥調  
治前病痊可之日朝見庶得微軀保全誓當鞠躬盡節  
以報陛下天地生成之德緣係欽取官員未敢擅便為  
此具本謹具奏聞伏候勅旨

一為懇乞天恩辭免加官陞任事

奏為懇乞天恩辭免加官陞任事臣比者奉命征勦寧夏賊寇總制邊務本年九月十九日奉勅行取馳驛來京欽遵起程間又蒙聖恩陞任戶部尚書初寧夏事平臣即將衰病不能供職緣由具本陳乞休致及奉行取陞職中途感患風熱痰嗽眩暈等病又經具本辭免俱未蒙俞允續該兵部題為捷音事節該奉欽依提督軍務都御史楊一清協同擒獲撫定地方功勤茂著加太

子少保尚書仍舊賞銀五十兩紵絲五表裏欽此臣病中聞此感恩益切不敢留滯扶病前來到於京城宣武門外請醫調治瞻望闕廷咫尺不能朝見內自警惕寢食不寧伏念尚書乃今日文臣之極致戶部實國家元氣之所關如臣庸愚誤蒙簡任分量固已踰越盛滿實難勝戡未諧懇避之私益重貪榮之愧若寧夏之事臣未至地方邊將宣力元克授首其後擒獲逆黨撫安軍民功皆常事實無異能金帛之賜已為過分官秩之加



豈所敢當且宮保位望隆重本非賞功之官而臣因人成事又無功能可錄書曰德懋懋官功懋懋賞臣德不稱官恐貽負乘之誚無功受賞徒增淵谷之危況犬馬之年漸老蒲柳之質易衰縱使前病暫痊強顏班列而精力不逮豈復能有所建立是以不避斧鉞昧死懇陳使望聖慈察臣誠款收回太子少保尚書成命容臣仍以舊官放回休致不勝感戴天恩之至緣係辭免加官陞任事理為此具本謹具奏聞伏候勅旨

關中奏議卷十